



**CRINAGORAE MYTILENAEI  
VITA ET EPIGRAMMATA.  
PARTICULA PRIOR.**

---

**DISSERTATIO INAUGURALIS  
QUAM  
SENSU ET AUCTORITATE  
AMPLISSIMI PHILOSOPHORUM ORDINIS  
IN  
ALMA LITTERARUM UNIVERSITATE  
FRIDERICA GUILIELMA BEROLINENSIS  
AD  
SUMMOS IN PHILOSOPHIA HONORES RITE CAPESSENDOS  
DIE VII M. OCTOBRIS A. MDCCCLXXXVII  
PUBLICE DEFENDET  
AUCTOR  
MAXIMILIANUS RUBENSOHN  
GUESTPHALUS**

---

**ADVERSARII ERUNT:**

A. Gudeman, Cand. phil.  
R. Zimmermann, Dr. phil.  
P. de Rohden, Dr. Phil.

---

**BEROLINI 1887.**

**TYPIS EXPRESSIT CAROLUS SALEWSKI.**



**HERMANNO DIELSIO**

**S.**



## I.

### De vita Crinagorae.

De Crinagorae Mytilenaei vita quaestio quomodo instituenda sit, opera levi constituet, qui epigrammata Crinagorae quamvis raptim percurrerit atque comparaverit cum exilibus quae de eo leguntur scriptorum testimoniis. Statim enim omnia fere, quae de poeta illo novimus et quae ut certa atque indubitata *Reiskius*,<sup>1)</sup> *Jacobsius*,<sup>2)</sup> *Geistius*<sup>3)</sup> aliique tradiderunt, et ex poematis ipsis elicitae esse et eis reapse contineri percipiet ideoque, qui de eo scribere velit, hunc a carminibus proficisci, referre omnia ad carmina necesse esse. Itaque nos quoque vitam poetae hoc in capite enarraturi eam disserendi rationem amplectemur, ut singula epigrammata, quae ad Crinagorae vitae conditionem, necessitudines, aetatem investigandas momentum habent, conquiramus atque quae eis patefiunt, cuncta congeramus.

Cui negotio id certe summo emolumento est, quod Crinagoras quamquam alioquin, a metro si discesseris, magnis nec virtutibus nec vitiis ex ceterorum Anthologiae poetarum eiusdem aetatis magno numero eminet, eo tamen nomine eis aliquanto praestat, quod cum ceteri semper fere eadem vel similia argumenta versibus exornent ac veteres huius poesis generis cultores, in permultis Crinagorae epigrammatis eius imitationis vestigia non inveniuntur, contra certas occasiones, quibus accommodata sunt, dispici etiam nunc licet. Neque tamen hoc, quod

---

<sup>1)</sup> Anth. Graecae a Constantino Cephalae conditae libri tres (Lips. 1754): „Notitia poetarum“, p. 221 sqq.

<sup>2)</sup> Animadversiones in epigr. Anth. Gr. vol. III. p. III: „Catalogus poetarum“, p. 876 sqq.

<sup>3)</sup> „Krinagoras von Mytilene.“ Giessae. 1849. Progr.

peculiare non paucis sane carminibus tribuere possumus, ita ampliandum est, ut ad pleraque, ne dicam omnia revocetur atque unumquodque epigramma limpidum quasi fontem esse ponamus, unde probissima uberrimaque de Crinagorae vita atque fortuna indicia haurire cuilibet liceat. Ita autem rem instituit Geistius in disquisitione, quam supra laudavimus, atque id opusculo summa ceteroquin diligentia et subtilitate conscripto mirum quantum nocuisse arbitramur, quia multa narret de poetae statu, itineribus aliisque, quae fulciantur non certis poetae verbis ad certas personas aut res referendis, sed eis tantum versibus, quos quivis alius poeta item condere poterit, cum nullo pacto Crinagoram de se loqui comprobari queat.<sup>1)</sup> Unde multas ille easque ex parte audaciores coniecturas periclitatus est, quae si stare possent, quam animo effinximus poetae imaginem haud leviter immutarent. Nos contra ad certas occasiones ea carmina referemus sola, ex quibus eae aperte eluceant summa cum cautione et circumspectione grassantibus. Nullo alio modo eam, quae in his litteris iure requiritur, probabilitatem nos efficere posse iudicamus. At quo tutius pedem figamus et ad firmitus quasi adminiculum annitamus, priusquam ad rem ipsam, quam tractandam nobis proposuimus, nos convertamus, paucis testimonia illa disceptemus, quae exstant de Crinagora.

Primo loco commemorare par est unum ex antiquioribus florilegiorum conditoribus, *Philippum Thessalonicensem*, qui et ipse huic poesis generi operam dabat et duobus fere saeculis post Meleagrum Gadarenum, cuius Στέφανος ca. a. centesimum a. Chr. n. in lucem protractus est, in unum corpus eorum poetarum epigrammata conflavit, qui post Meleagrum floruerant. Sicut hic, ita Philippus consilium collectionis suae patefecit prooemio, quo totum opus inchoatur et — id quod cum Coronae ratione consentaneum videbatur — singuli poetae singulorum florum nominibus nuncupantur. In hac igitur praefatione (A. P. IV 2,8) Crinagoras quoque locum obtinet comparatus

---

<sup>1)</sup> Hoc etiam ei qui librum recensuerunt, existimant: *Stollus* (Z. f. d. A. W. 1850. 35) et *Bachrius* (Heidd. Jahrbh. 1849.).

ille cum ramo (ὥς δὲ κόρυμβος Κριναγόρας sc. πρέφει στεφάνῳ), qua quidem ex imagine nihil fructus lucratur. Utrum aetatis poetarum, an auctoritatis et gravitatis in prooemio hoc disponendo ratio habita sit, nondum exploratum est, quamquam res quaestione haud indigna videtur. Fortasse ex mero casu nominum ordo dependet. Id vero notabile est, primus qui commemoratur a Philippo, poetam Antipatrum Thessalonicensem, qui compluria carmina L. Calpurnio Pisoni, Thracum victori, dicabat, non in posteriores huius sylloges epigrammatistas referri. Quem cum continuo Crinagoras sequatur, hunc quoque priori propius quam posteriori termino admoveere nos posse arbitror. Indubitatum vero ex testimonio Philippi id ponitur Crinagoram intra centesimum a. a. Chr. et centesimum a. p. Chr. fuisse.

Hoc temporis longum spatium artioribus finibus circumscribitur loco quodam *Strabonis*, quo de illustribus Mytilenes viris disseritur. Qui posteaquam de Pittaco, qui vetustioribus temporibus in insula floruit, narravit, quae narranda putat, sic pergit (l. XIII p. 617): ὕστερον δ' ἐγένετο χρόνοις πολλοῖς Διοφάνης ὁ ῥήτωρ, καθ' ἡμᾶς δὲ Ποτάμων καὶ Λεσβοκλῆς καὶ Κριναγόρας καὶ ὁ συγγραφεὺς Θεοφάνης. Hic Crinagoras Reiskium l. l. etiam haesitasse, num idem esset atque epigrammatarius, noli mirari; nam id testimonium, quo omnis haesitatio extruditur, nondum noverat. Quo magis mireris hoc ab Geistio et Jacobsio ne allatum quidem esse, cum eo solo Strabonem innuere poetam certo comprobetur. Legitur autem in *lemmate*, quod scriba A<sup>1</sup>) ad ep. 4 appinxit: Κριναγόρου Μυτιληναίου; ceteris enim in lemmatis omnibus patriae poetae mentio non inicitur. Sed redeamus ad Strabonis verba. Unde utique, quod statuit cum Jacobsio Geistius, Crinagoram, Strabonis aequalem, Augusti aetate scripsisse minime concedo effici posse. Etsi Lesbocles atque Potamon rhetor Augusto et Tiberio regnantibus vitae florem consecuti sunt, de Theophane rerum sriptore idem obtineri nequit. Ut Strabo ipse extremo capite proluxius tradit atque aliis, quae afferre hic nihil attinet,

<sup>1</sup>) Vide apparatus criticum.



testimoniis constat, ex intimis et perpetuis comitibus Pompei erat. Eius honoris causa patria Crinagorae urbs, quae bello Mithridatico, cum ambiguum Romanis fidem praestitisset, a M. Thermo praetore expugnata erat, in pristinam libertatem redacta est. Theophanis filium<sup>1)</sup> ut aequalem tum etiam vigentem idem Strabo l. l. commemorat: οὐδὲν τε ἀπέλιπε Μάρκον Πομπήϊον, ὃν τῆς Ἀσίας ἐπίτροπον κατέστησέ ποτε Καῖσαρ ὁ Σεβαστός, καὶ νῦν ἐν τοῖς πρώτοις ἐξετάζεται τῶν Τιβερίου φίλων<sup>2)</sup>. Quae si ita se habent, id pro certo affirmari potest Strabonem haudquaquam nos *cogere* Crinagorae aetatem usque ad Augusti aut Tiberii tempora producere idque unum inde confici non ita multo ultra Strabonem poetae vitam protrahere licere, retro autem nos nullo limite cohiberi. Quemadmodum Theophanem, item Crinagoram καθ' ἡμᾶς γενέσθαι Strabo dicere potuit, etiamsi Pompei aequalis fuisset.<sup>3)</sup>

Non inconsiderate nos nulla ex parte viae nostrae impedimenta obiecissemus, ita ut, sicut libet, exspatiari possimus intra terminos, quos supra pepigimus, luculente docemur tertio vel potius quarto testimonio, quod iam in consortium eorum, quibus defuncti sumus, addemus. Exstat in *Etymologico Max.* s. v. ἄρπυς, cui adscripta leguntur haec verba memorabilia: Ἄρπυς ὁ ἔρως, ὡς παρὰ Παρθενίῳ ἐν Κριναγόρᾳ· Ἀμφοτέροις ἐπαβὰς ἄρπυς ἐλήϊσατο.<sup>4)</sup> Cum vel Jacobsius se, quid sit Parthenii Crinagoras, cum ignorantissimis ignorare confiteatur, *Meinekus* (Analecta Alex. p. 16 et p. 266) cum recte illud explicavit, tum nostram de Crinagora cognitionem haud tenuiter adauxisse videtur. Vix

<sup>1)</sup> aut nepotem, si *νιωνόν* legimus cum Visconti.

<sup>2)</sup> Arduam de Theophanis progenie quaestionem hic attingere nolumus, sufficiat monuisse mihi quidem perquam verisimile videri epp. A. P. VII. 219 et IX. 28 (647?), quorum de auctore in capite quarto pauca addemus, filio vel nepoti Theophanis deberi neque — maxime ob Antoniae mentionem, vide p. 20 — tam, quam editoribus, improbable etiam ep. Kaibelii nr. 810 ad eundem spectare. Sed hoc carmen nondum omni ex parte expeditum est a vv. dd., qui ei operam dederunt.

<sup>3)</sup> Hoc *Niesii* disputatione (Herm. vol. XIII. p. 33—45) confirmatur, qui ostendit Strabonem καθ' ἡμᾶς verba eis attribuisse omnibus, qui mortui essent post a. 690/1 a. u. c.

<sup>4)</sup> cf. Hesych.: ἄρπυν, ἔρωτα. Αἰολεῖς.

enim in dubium revocari potest, quin lexicographi verba de carmine quodam Parthenii Crinagorae dicato accipienda sint. Huiusmodi poemata, quae aliorum poetarum nomina prae se ferunt, non raro Alexandrinorum temporibus ac postea condebantur, cuius consuetudinis Meinekius nonnulla exempla contulit. Unde sequitur, ut Crinagoras Parthenii aequalis fuerit, hoc propterea magni momenti est, quod Parthenii vitae spatium duce Meinekio certo determinare possumus. Huius locus classicus, quem dicunt, habendus est Suidae de Parthenio nota limpido, ut videtur, ex fonte hausta. Quem auctorem ut sequamur, Parthenius Nicaeae aut Myrleae natus bello Mithridatico ab imperatore quodam Romano captus Romam deductus est, quod a. 681 a. u. factum sit necesse est. Quod deinceps Suidas prodidit aetatem Parthenii usque ad Tiberii imperium processisse, hoc eum non recte rettulisse vel inde apparet, quod Parthenius, si vicesimum annum agentem eum facimus, cum Romam venit, a. 767, quo Tiberius ad rei publicae gubernacula accessit, plus 107 annos natus erat, id quod verisimile non est. Neque tamen plane ex vano haustum est, quod Suidas narrat; nam manasse videtur ex Suetonii vita Tib. c. 70, quo Tiberium Parthenii carminibus maxime delectatum esse traditur. Itaque non imperatori Tiberio, sed *adulescenti* cum Parthenio sene consuetudo erat familiaris. Iam quaerendum est, quid ex testimonio Etymologici Max. elicere possimus ad Crinagorae aetatem determinandam. Tiberio imperatore si Parthenius ultra centesimum annum progressus esset, etiam Crinagoras, eius amicus, iam senectutem attigisset, nisi forte quadraginta annis minor natu fuit. Neque igitur temere statuemus Crinagoram floruisse saltem Augusto regnante. Num aliquantulum insequentis imperii vita eius perduraverit, non liquet; sed si certis indiciis Tiberii quoque aetati assignetur, per testimonia externa hoc fieri posse iudico.

Neque hoc modo eis, quae de testimoniis disseruimus, patefactum est, sed etiam illud pro certo affirmare licet duas esse Crinagorae vitae partes, alteram, qua Mytilenis, alteram, qua Romae versabatur. Quod discrimen etiam in carmina cadere,

ut haec digerenda sint in *Lesbia* et *Romana*, non illico patet. Quamquam nihil obstat, quominus quae ad Graecos homines referenda sunt epigrammata: 1 (Πρώτη), 3 (Ἀντιφάνης), 4 (Πρόκλος?), 9 (Σώσανδρος), 10 (Σίμωνος υἱός?), 13 (Δημοσθένης), 15 (Σέλευκος), 17 (Εὐνικίδης), 18 (Ἑρως), 19 (Σελήνη), 22 (Ὑμνίς), cuncta *Lesbia* vocemus.<sup>1)</sup> Sed haec res non paucas habet cautiones. Namque in monumentis sepulcralibus *libertinorum* Romanorum saepissime eiusmodi nomina graeca leguntur, quorum pauca afferre non pigebit: *Corneliae Selene*, uxori optimae (CJLX 6031); *Prote* coniugi (ib. 254). *Cantinia Hymnis* (ib. 28); *M. Valeri M. l. Simonis* (C J L 4931). Permulta etiam exempla exhibet vol. VI pars III nuper emissa, ubi saepiuscule haec et similia nomina Graeca (*Erotis* quoque et *Procli*, *Proclae*) leguntur. Quod intuentes complures coniecturas a Geistio expromptas ad irritum cadere facile comprobare poterimus. Proten enim filiam nobilis cuiusdam Romani esse ponit primam genitam; neque vero nobili genti Romanae eam adscribendam neque primam genitam esse oportere inscriptionibus comprobatur. Cui haud dissimilem sententiam idem v. d. de Proclo animo informavit, cum recte quidem illam vocem υ littera elisa graeci nominis formam induisse, sed nihil esse nisi latinum Proculum perspiceret, utique tamen hunc Proculum summo loco ortum et eo patre natum esse sumeret, qui Augustam familiam proprio amicitiae gradu contigisset. Hoc ut futile est, ita quod extrema argumentatione conicit fortasse intelligendum esse Proculi, Augusti liberti, filium, non est quod graviter refragemur. Magis me suspensum tenet carmen illud, quo poeta ampullam aeneam Simonis filio natalem agenti, amico dulcissimo, muneri mittit. Geistius a Suida profectus iure admiratur lexicographum, cum s. v. ὅλην totum epigramma suppeditaret, verba οἱ Σίμωνος omittere; inde colligit, siquidem saepe, quae in codice corrupta propagarentur, praeteriret,<sup>2)</sup> Suidam hoc quoque versu verba illa corrupta ratum non exscripsisse. Hoc fortasse

1) Vide de unico Aeolidis dialecti vestigio p. 26.

2) Vide apparatus crit. ad ep. 6.

eo confirmatur, quod non raro, ut postea demonstrabimus, scriba in versus exitu cum litteras archetypi non dignosceret, lacunam correctione qualicunque celavit et quod praeterea scriba A accentum omisit, omissum C demum supplevit<sup>1)</sup>. Quam ob rem Geistii coniectura „Αἰβωνος“ probabilitate non omnino destituta est. Attamen cum rasurae nullum dispexerit vestigium Stadtmuellerus, qui v. d. compluries hunc versum excussit, atque cum multa, quae non ad rem explicandam faciunt, Suidas praeternittat cumque praeterea etiam alios ac Romanos donis et carminibus prosequi possit poeta, in textu reliquimus Σίμωνος nomen, sive graecum sive libertinum est.<sup>2)</sup> Redeamus interea eo, unde digressi sumus, ad poetae aetatem indagandam.

Quo anno, quali opportunitate usus<sup>3)</sup> Romam ille venerit, liquido eruere non possumus, cum epigrammata ipsa ansam ad hanc rem diiudicandam non dent. Proximum igitur est, ut quibus temporis indicia impressa sunt carmina interpretati terminos quosdam constituamus, qui initio et exitui vitae Crinagorae eiusque profectioni in Italiam proximi pangendi sunt. Primum sub examen vocemus

*ep. XXXII.*

Hoc epigrammate poeta iuvenili quodam, ut mihi videtur, fervore proventus vehementissime sortem Corinthi, urbis olim clarissimae, deplorat, cuius gloria antiquissima foede inquinata esset turba „venalium nequam“ servorum, qui ossa Bacchiadarum nunc indigne premerent. Mari eam submersam esse cupit, Aegira (?) humiliorem, desertiorem Lybica arena. — Intellegenda nimirum est libertinorum colonia a Julio Caesare a. 710 in Isthmum deducta, qua Corinthus, si Dioni (l. 43 c. 50) fidem adiungimus, τότε ἅμα ἀνεβλώσχοντο (etiam Carthagini mentionem

<sup>1)</sup> Hoc saepius non parvi esse momenti infra ostendam.

<sup>2)</sup> Item non plane abiecerim eiusdem v. d. de Evandro (ep. 22) opinionem. Hunc enim *coelatorem* Evandrum, captivum Alexandria Romam deductam (sec. Porph. ad Hor. sat. I 3,91), esse conicit. Eius verna Hymnis appellari et Crinagorae Hymnis esse *potuit* profecto.

<sup>3)</sup> Quamquam de hac re coniecturam qualemcunque periclitari licere comprobabimus p. 20 sq.

fecerat scriptor) καὶ ἔμελλον αὐθις ἀνθῆσαι.<sup>1)</sup> Spirat hoc carmen ingenium non modo poeticum, sed etiam vere Graecum. Graecus poeta loquitur, cui factum illud opprobrium Graeci nominis esse videtur et *recens* in visceribus haeret. Quod qui reputarit, consentiet mecum carmen anno 710 vel paulo post conditum esse censente,<sup>2)</sup> id quod cum indiciis externis ex omni parte congruum est. Hoc posito consequens videtur esse Crinagoram, alterum quasi Horatium, a partibus primum adversariorum Caesaris stetisse, neque tamen, cum postea in familiaritatem gentis imperatoriae se insinualet, perpetuo eis adhaesisse, sed novo rerum ordine postremo acquievisse. Contra qui eam sententiam amplectuntur, qua hoc epigramma posteriori aevo attribuitur, ei artificiose occasionem quandam excogitare debent, qua adductus poeta hos versus concinnaverit. Atque cum revera se, quod quaesiverant, invenisse putant, nova exoritur difficultas. Nam quomodo poeta, qui Octavia eiusque liberis familiariter usus est, tam petulanter invehi potuit in Caesarem ipsum, cum coloniam ab eo deductam eiusque incolas (cf. v. 5) tam protervis dictis incesseret? Quod aenigma illi quidem Crinagorae lectoribus proponunt, solve nequeunt. Ne Geistius quidem feliciter omnes scopulos eluctatus est, cum ad iter quoddam in Asiam factum versus illos referret. Quid revera hunc v. d., ut multo post Caesaris mortem epigramma compositum esse ratiocinaretur, adduxerit, diserte ipse non exposuit. Suspicio equidem factum id esse opinione quadam de poetae aetate praesumpta. At, uti dixi, iusta argumenta proferri non possunt, quibus Crinagoram nondum ante a. 712 scribere potuisse appareat; *scribere* dico, non Romae commorari. Nam ut illud certum videtur, ita hoc argumentando effici nequit, immo multo verisimilius est eum tum etiam extra Italiam moratum esse. Quod si recte statuerimus, commodissime iam hoc loco ea epigrammata recensebimus, quae spectant me iudice ad migrationem illam Italicam.

<sup>1)</sup> Cf. Paus. II 1,2.

<sup>2)</sup> *Non post a. 712*; sic Mommsenus, qui in appendice libri de loco cladis Varianae (Berol. 1885, p. 62, ann.) hanc sententiam ascivit.

Huius nonnulla vestigia relictæ sunt.<sup>1)</sup> Neque enim umquam mihi persuadebo *renavigaturum* ex Lesbo in Italiam poetam carmen 43 panxisse, postquam aliquamdiu in patria versatus esset. Immo non modo verisimile est, sed optime cum universo epigrammatis tenore consentaneum Crinagoram hanc *primam* navigationem parantem a Menippo Pergameno petisse, ut descriptione itineris missa „dux sibi fieret“, nisi forte quis fieri potuisse negat, ut Crinagoræ amici (ἔταιροι), ipsi quoque Mytilenæi, Romæ iam ante poetæ profectionem morarentur. Horum autem desiderio commotus cum ἤδη δηρὸν χρόνον ab eis abesset, ipse Romam demigrat. Neque dicis causa, ut quasi geographi auribus aliquid daret, epigramma hoc Crinagoram scripsisse elucet ex verbo περίπλουν<sup>2)</sup>, quod terminus proprius talium descriptionum habendus est neque aliter explicari potest, nisi forte cum Dindorfio (vide notam) genitivum substituas. Menippi vero geographi ætas huic sententiæ neutiquam adversatur; nam hoc unum scimus aliis testimoniis eum floruisse post Demetrium Magnesium i. e. *post Ciceronem*. Quæ Marcianus, qui Menippi περίπλουν brevavit, de hoc et aliis eius scriptis memoriæ tradidit, bene concinunt cum epigrammate Crinagoreo. Nam præter περίπλουν τῆς ἐντὸς θαλάσσης scripsisse dicitur διάπλους i. e. secundum Muellerum I. p. CXXXVI „navigationes ab altera ad alteram continentem sive linea recta per altum nullisque stationibus interruptas sive via per insularum stationes delineata“ διάπλους διὰ πόρου illas, has διάπλους διὰ νήσων;<sup>3)</sup> etiam de insulis eorumque *ambitu* dixisse Menippum clare testatur Agathemerus (I, 5), Marcianus denique eum „geographica historicis quoque illustrasse“ auctor est. Non frustra διάπλῳ illi διὰ νήσων vel περίπλῳ a Menippo commodato

<sup>1)</sup> Cf. ep. IX 90 *Alphæi*, Crinagoræ et æqualis et popularis, qui Romam profecturus (Ἄρεος πόλιν) secundam navigationem ut sibi præberet, Neptunum orat, et Antipatri Thess. ep. X 25.

<sup>2)</sup> Etenim hunc mitti sibi vult poeta, non — quod Muellerus scribit — Ἰστοῖα κύκλον, quibus verbis hæc itineris descriptio insigniri non potest.

<sup>3)</sup> eas περίπλῳ ipsi insertas et subiunctas fuisse Muellerus conicit; quo iure, nescio.

operam dedisse, sed eum diligenter adhibuisse itineri videtur poeta. Hoc intelligitur ex ep. 42, ubi Sybota insulam<sup>1)</sup> *geographos περιγράφοντας* septem stadiis metiri posse perhibet atque de fertilitate insulae et portibus nonnulla eodem ex fonte hausta profert. Hanc vero insulam *Corcyrae*, quam ipse in ep. 43 commemorat ut itineris stationem, vicinam eum praetervehi oportebat, qui ex Graecia in Italiam tendebat; neque alio modo priora duo verba νῆσον τήν (*die Insel hier*) et extremum primi versus ἔχουσιν (*vermögen*) intellegere quisquam poterit. Prospere migrationem processisse ex ep. 46 discimus, quo poeta Neptuni favorem expertus, ut aliis quoque *Aegaeum* mare emetientibus faveat, vota facit.<sup>2)</sup> Maximo igitur ad Menippi aetatem determinandam momento foret, si eruere liceret, quo anno Crinagoras Mytilenis in Italiam demigraret. Id aliquatenus — nam ut supra dictum est, liquido annum nemo dispiciet — continget ratione et via explicatis eis, quae iam censurae subiciemus, epigrammatis:

*ep. 23.*

Spectat carmen ad *Philostratum* Academicum, Cleopatrae συμφιλοσοφήσαντα (sic Philostratus), quem posteaquam per regios fautores ditatus esset, iam omni auxilio destitutum in misero quodam et deserto Aegypti vico, Ὀστρακίνη scilicet, σταθμῷ ἀνδρῶν, sepultum iri poeta vaticinatur. Complura de hoc philosopho ex Plutarchi Ant. c. 80 (cf. Cat. c. 57, Phil. Vitt. Soph. 6, 19) comperimus; Ario intercedente Caesar ei pepercit. Hoc quoque poema, ut de Philostrati sorte [morte?] nuntius allatus est, quo videlicet Crinagoras vehementer concutiebatur, conscriptum est meo iudicio, i. e. ca. 724. Num tum temporis iam Romae poeta moratus

<sup>1)</sup> Ad „Sybota“ i. e. quod nos vocamus *Sauweide*, hoc ep. spectare Reiskius speciosa et ingeniosa coniectura assecutus est, quam Jacobsium frustra diluere conatum esse Geistius probavit Thuc. I, 54; Cic. ad Att. V, 9 adhibitis.

<sup>2)</sup> Etiam metrica epigrammatum ratione illam sententiam maxime commendari demonstrabimus infra p. 38, 41<sup>1</sup>, 42. Ceterum ad Menippi amicitiae memoriam excitant nos nonnulla geographica nomina exquisitiora cf. epp. 34, 36 (39, 23, 31, 18?)



sit, ex his versibus minime concludi potest; sed ei qui id ponit, non habeo quod resistam. Multo autem verisimilius hoc poneretur, si verum esset — id quod Brunckius, Reiskius, Jacobsius statuunt —

*ep. 47*

quo amicus Crinagorae „intra bibliothecae claustra usque retentus“ ut Athenas profectus mysteria Eleusinia invisat, admonetur, si verum igitur esset in laudem initiorum Eleusiniorum „quibus Augustus a. 723 initiatus est,“ carmen concinnatum esse.<sup>1)</sup> Mihi haec temporis significatio in epigrammate inesse non videtur, quod idem probatur Geistio, qui quidem illa coniectura reiecta alteram profert magis probandam. Nam Crinagoram ipsum Athenis moratum [in itinere in Italiam suscepto?] atque sacris eis initiatum esse apparere autumat hoc ex carmine. — In solidiore fundamento iam securis vestigia ponere licet nobis, si recte interpretabimur

*ep. 11.*

Dubitationi vix obnoxium est, quin Marcellus, quem poeta alloquitur, idem sit ac laudatissimus vir *M. Claudius Marcellus*, C. f., deliciae populi Romani (Tac. Ann. 2, 41; Dion. 53, 31), ab omnibus scriptoribus summis laudibus celebratus, quem a. 712 aut 713 natum esse ex Vell. Pat. 2, 93, Dion. 53, 28 aliisque locis concluditur. Bellum Hesperium (ad quod pertinet eiusdem Crinagorae ep. 34) iure bellum Cantabricum esse censent vv. dd. inde ab a. 727 usque ad a. 729 gestum<sup>2)</sup>. Cui etiam Marcellum interfuisse ex Dionis l. 53. c. 26 discimus, ubi per Marcellum et Tiberium, quasi aediles, spectacula in ipsis castris militibus exhibita esse traditur. Idem scriptor narrat etiam a. 729, cum Augustus morbo in Hispania retineretur, nuptias Marcelli et Juliae ab Agrippa paratas esse (ib. c. 27.) Ex Crinagorae igitur epigrammate colligi potest Marcellum iam initio anni 729, priusquam bellum profligatum esset per Augusti legatos (ib. c. 25, Flori II 33) in Italiam reversum festum lanuginis depositae diem

<sup>1)</sup> Vide Dion. l. 51. c. 4; Suet. Aug. c. 93; cf. etiam Kiesslingium: Zur Chron. u. Anordn. d. Hor. Oden (Phil. Untersuch. II) p. 537.

<sup>2)</sup> Cf. Hor. c. III 14.



egisse. Cum nuptiarum mentio non fiat neque has sollemnia ea, quibus τὸ πρῶτον γενύων ἡθρόοισιν ἔαρ<sup>1)</sup> tondebatur, antecessisse verisimile sit, epigramma, de quo agimus, *ineunte anno 729* conditum est; atque hunc in modum certum adipiscimur annum, quo Crinagoras Romae iam versatus sit necesse est.

At etiamsi hoc epigrammate, quod merito in vita poetae praefigitur ceteris, primo peregrinatio, ut ita dicam, Romana stabiliatur, ob ipsum argumentum vix aberrabimus coniectura, si iam aliquot annis antequam sic de Marcello verba facere posset, Romae Crinagoram moratum esse contendemus. Atque reapse hoc comprobatur, etsi Geistius et alii id adhibere neglexerunt, optime et fidissime ex

*ep. 41.*

Poeta eidem *Marcello* Callimachi poema, quod inscribitur *Hecale*, dono mittit, cum par Theseo robur iuventae neque minorem vitae splendorem adulescenti optat. Nonnullis annis ante nuptias cum Julia initas puero etiam Marcello hoc carmen concinnatum esse liquet, ut nunc verisimillimum fiat — id quod ex epigrammate ipso non licebat ad confessum perducere — Crinagoram cum poema 23 scriberet, iam Romae fuisse. Item epigramma illud si cum ep. 29, quo *Antoniae* (v. p. 13) diem natalem (?) agenti codicem lyricorum muneri dat,<sup>2)</sup> atque cum ep. 4, quo Proclo, abecedario cuidam incognito nobis, quamquam Geistius eum nosse sibi videtur (v. p. 6), calamum scriptorium mittit, si igitur cum his carminibus illud componamus, patefiat, quomodo Romae se gesserit poeta, quae ei in urbe vitae conditio fuerit. Qui in eis Graeculis videtur habendus esse, qui posteaquam Romam se contulerunt, *praeceptorum* vicibus fungebantur simulque poesin et doctrinam suam diversissime in usum suum convertebant [velut epigrammata ea condebant, vel videntur potius condidisse, quae in sepulcris inciderentur]. Poeta

<sup>1)</sup> ep. 7, 4, quod falsissime Geistius ad eandem occasionem nescio quo pacto referri vult, cum *Εὐκλείδης* non nomen esset fratris poetae, sed corruptum ex *εὐκλειᾶ* vel *εὐκλεινον*, vide notam.

<sup>2)</sup> Hos codices ipsum descripsisse praeter necessitatem sumit Geistius, vide Baehrium l. l.

Mytilenaeus quamquam et domum (ep. 44) et servum (ep. 14) possidebat, ipse se hominem curtae crumenae esse et frustra divitiarum somnia effinxisse profitetur ep. 27. Cum praeterea ex carminum stilo et elocutione planissime eluceat<sup>1)</sup> in grammatica studia Crinagoram incubuisse, non meram coniecturam<sup>2)</sup> excudisse nobis videtur, cum eum grammaticis et praeceptoribus ascriberemus, quorum permagnus certe numerus Romae fuit Augusto regnante. Ex carminibus autem, unde profecti sumus, simul collegeris eum vel *Octaviae liberos* Graeca lingua atque Graecis scriptoribus interpretandis erudivisse. Quod certis argumentis ut demonstretur, nemo postulet, immo si quis hoc ita esse neget<sup>3)</sup>, quo ei persuadeam, nihil habeo. Quamquam opinioni illi suffragari quivis concedet cetera carmina, quae ad Octaviae familiam spectant. Quorum primum contemplemur

ep. 8

iure relatum ad *Antoniam*, corporis forma et indole mentis pariter excellentem,<sup>4)</sup> τὴν σωφροσύνη καὶ κάλλει περιβόητον Ἀντωνίαν (Plut. Ant. c. 87, cf. Crin. ep. 29,4). Lucinam poeta precatur, ut mites dolores annuat, quos Antonia puerperio perpessura sit. Cuius infantis puerperium intelligendum sit, poemate ipso non significatur, sed cum praeter Drusum (πόσις) et Liviam (ἐκυρή etiam Octavia (μήτηρ) nominetur, ante huius mortem epigramma editum est (a. 743). — Ad *Cleopatram*, Antonii ex Cleopatra filiam, cuius tutelam Antonio et Cleopatra mortuis Octavia item, ut ceterorum liberorum acceperat (Plut. Ant. c. 87), quam ipsa educavit filiae loco, pertinet ep. 28. Reiskius ad Berenices cum Ptolemaeo nuptias respici arbitratus Calli-

<sup>1)</sup> Vide insequens caput.

<sup>2)</sup> Quae confirmatur exemplo *Antipatri Thess.*, aequalis poetae, eadem conditione vitae usi, qui se *ludi magistrum* esse ipse auctor est A. P. V 3: εἰς πολλοὺς ἡϊθέων ὁάρους.

<sup>3)</sup> Fortasse propter Strab. l. XIV p. 675: (ἐκ Τάρσου) Ἀκαδημικὸς δὲ Νέστωρ ὁ καθ' ἡμᾶς, ὁ Μαρκέλλου καθηγησάμενος, τοῦ Ὀκταουίας παιδός. Sed alter grammaticae Marcellum instituere potuit, philosophia alter.

<sup>4)</sup> consulto non dico animi, nam in Claudium filium morum praeferbat immanitatem matre prorsus indignam (Suet. Cl. c. 3). Ad eandem revocatur ep. 12 (cf. p. 45).

macho carmen tribuit (in notitia poetarum antiquiori cuidam Crinagorae). Id vero omni firmo fundamento carere luculenter eis, quae *Passovii* et *Weigandi* opera<sup>1)</sup> iam de compositione Anthologiae constare dicendum est, demonstratur, siquidem hoc epigramma ut *omnia* Crinagorea in continua serie epigrammatum legitur, quae ordinem alphabeticum sequuntur et ab poetis Crinagorae aetati proximis condita sunt. Nihilominus Geistius l. l. epigramma Crinagorae abiudicarat, antiquius ab huius auctore expressum atque erratum esse ratus in poetae nomine; sed postea (Z. f. d. A. W. 1849, 40) ipse illam opinionem abiiecit et ea compensavit, quam Hullemanus<sup>2)</sup> de carminis causa iam a. 1845 conceperat. Hic enim nuptias Jubae et Cleopatrae (Plut. l. l., Dion. 51, 15) a poeta significari suo iure monuit. Kiesslingius (l. l.), qui Parisinae editionis indiligentia deceptus illam sententiam ut novam profert, in auxilium vocavit, quae Mommsenus de his nuptiis et de regno Iubae in Eph. ep. vol. I. p. 276 disseruit, quibus constaret a. 734 sollemnia illa acta eodemque epigramma compositum esse. Universa sententia, uti dixi, mihi probatur; nam si quis in nominibus geographicis offendat, Graeculum hunc, quamquam amicus fuit Menippi, artem geographicam non admodum callere reputet (cf. infra p. 22). Aliam vero nos atque vv. dd. opinionem animo imbibimus de tempore illarum nuptiarum, quas, ut Niesius (l. l. p. 35. ann.) Jubae mortem, item propter Strab. l. XVII p. 828<sup>3)</sup> propius ad *initia* regni protrudendas esse existimamus. — Ad eandem *Cleopatram*, quam Plut. (ib. c. 36) et Suidas, (s. v. Ἰόβας: . . . τὴν Κλεοπάτρας θυγατέρα, Σελήνην, . . . ἐπεποίητο γυναικα) *Selenen* appellatam esse tradunt, ad hanc igitur Geistius (Z. f. d. A. W. 1849, 40) referri fortasse posse significavit, *Woltersius* autem (Mus. Rhen. vol. 41, p. 345) illius opinionem

<sup>1)</sup> Ille in „Opusculis Academicis“, hic in Mus. Rhen. a. 1845 et 47.

<sup>2)</sup> „De vita et scriptis Jubae Maurusii disputatio“. Symbolae literariae doctorum Gymn. Batav. fasc. 7. Librum ipsum inspicere non potui.

<sup>3)</sup> Ἰούβας μὲν οὖν νεωστὶ ἐτελεύτα τὸν βίον; nummi cum utraque sententia coire videntur

ignorans nuper iam fidentius rettulit etiam ep. 19, quo Selenes cuiusdam mors deploratur. Coniectura memorabilis certe est; sed cum Selene obierit a. 750, metrum carminis parum expolitum (vide p. 31 et 38) illi opinioni adversatur, mirum praeterea videtur neque regem Jubam neque *reginam* Cleopatram nominari, sed in uno *cognomine* se continuisse poetam (cf. etiam p. 6). At quoquo modo res se habet, nemo infitias ibit Crinagoram in familia Octaviae, quae Graecis poetis et scriptoribus magnopere favebat<sup>1)</sup>, gratia floruisse etsatis familiariter usum esse Marcello eiusque sorore Antonia. Cum Druso enim, Germanico, Tiberio, Augusto non artiore necessitudinis vinculo copulatus erat, quamquam complura poemata, quibus illi celebrantur, exstant in Anth.: epp. 26, 34, 45 (cf. 48) ad *Augustum*, ep. 49 ad *Tiberium*<sup>2)</sup>, ep. 31 ad *Germanicum* pertinent, ep. 33 ad Tiberium et Germanicum (vide p. 21); *Drusus* commemoratur cum *Livia* et *Octavia* in ep. 8. Horum autem omnium nemo compellatur a poeta. Quam ob rem quod Geistius suspicatur una cum Augusto in Asiam Crinagoram profectum esse (propter ep. 26, ubi capella σύμπλοος Καίσαρος facta inter astra se relatum iri sperat), id tam mirum est quam omni fundamento destitutum. Paulo plures probabilitatis numeros habet eiusdem v. d. sententia de itinere Crinagorae Hispaniensi, modo poetam non Augusti, sed [discipuli sui?] Marcelli comitem fuisse statuamus, quocum una eum ad nuptias parandas praemisum esse. Tale enim iter testari epp. 34 et 15 haud inepte autumat v. d.<sup>3)</sup>

Jam secundum consilium initum restat, ut carmina obi-

---

<sup>1)</sup> Id discimus e. g. ex Plut. Poplic. c. 17 et, si recte coniectum est, ex nomine *Antonii Thalli* poetae. Germanicum autem epigrammatis vacasse efficitur ex carminibus, quae in Anth. sub eius nomine feruntur.

<sup>2)</sup> Cuius cum expeditiones Armenica et Germanica canantur, carmen post a. „746“ (Dion. 55 6; Vell. Pat. II, 97) ortum est. Etiam de „barbarorum incursionibus“ in Galliam Comatam (Suet. Tib. c. 9) cogitare posse Mommsenus me monuit, neque tamen has a poeta notari crediderim, cf. Herm. vol. 15, p. 111.

<sup>3)</sup> Speciosam *Geistii* coniecturam de Aquis Pyrenaeis ad ep. 34 ipsum afferam. Contra ep. 39 parum apposite ad eam coniecturam fulciendam (propter viam per Ligures Capillatos ducentem) v. d. allegavit.

tum Crinagorae proxime concinnata sub examen vocemus. Supra cum de testimoniis extrinsecus haustis ageremus, nihil indicavimus obstare, ne Crinagorae vitam in Tiberii aetatem promotam esse sumeremus. Via igitur plana utrimque patente videndum est, num largum illud temporis spatium circumcidere possimus. At primum defungi nos oportet duobus epigrammatis, quae falso iudicio Tiberio imperante scripta esse dicuntur:

*epp. 25 et 48.*

In priore sermo fit de *Nicia* Coi, cuius cadaver cives tumuli obicibus vecte amotis effoderunt effossoque insultaverunt. Viri docti non dubitant hunc *Niciam* cum illo eundem esse declarare, qui tyrannidem Coorum arripuit sec. Strab. l. XIV p. 658 et Ael. vv. hh. 1,29. Quem Coorum libertatem oppressisse annotant sub Augusti et Tiberii regno vel huius sub imperio solo. Hanc notam ut examinarem, *Niciae* nummos consului, quibus de Sallet., museo nummario Berolinensi praefecto, comiter me adiuvente illam sententiam facile corrigi posse intellegebam. Nam unus ex eis nummis hoc habet aversum: *Νικίας Χάρμυδος Κωίων* (Mionnet. 3,408, nr. 82), unde nihil sane discimus; Charmydus magistratus quidam fuisse videtur. At in *imperatoris* Coi insulae nummis idem obviam fit Charmydus, sed coniunctus cum Augusto sic (ib. nr. 84): *Σεβαστος: Χάρμυδος Κωίων*; inde elucet *Augusto* regnante *Niciam* floruisse. Huic temporis indicio certissimo, ut mihi videtur, scriptores neutiquam repugnant. De Aeliani fabella inepta, qua *Niciae* augurium quoddam ante tyrannidem acceptum refert, non est quod laboremus, Strabonis autem de *Nicia* verba capiti ei, quod *Coo* dicatum est (l. XIV. p. 657/58), intexta haec sunt: καὶ καθ' ἡμᾶς Νικίας ὁ καὶ τυραννήσας τῶν Κώων, καὶ Ἀρίστων ὁ ἀκροασάμενος τοῦ περιπατητικοῦ καὶ κληρονομήσας ἐκείνον. ἦν δὲ καὶ Θεόμνηστος ὁ φάλτης ἐν ὀνόματι, ὃς καὶ ἀντεπολιτεύσατο τῇ Νικίᾳ. Opera levi cognoscitur nihil in hoc loco inesse, quo ut *Niciam* tum etiam vivum fingamus, adducamur. Immo quae de Aristone philosopho et de Theomnesto deinceps narrat, suadent, ut *Niciam* tyrannide depulsum ponamus eo tempore,

quo Strabo opus suum composuit (ca. a. 18 vel 19), praesertim si verba ἤν δὲ καὶ respiciamus. Itaque Crinagorae quoque epigramma de poeta Tiberio regnante etiamtum vivo nihil omnino continet (vide praeterea p. 45). — Haud aliter iudicandum est de epigrammate 48.

Cuius de interpretatione optime meritus est Geistius, cum quis esset Κρίστος, ad quem versus suos Crinagoras direxit, fidenter erueret. Approbavit enim Schneideri, qui de Passieno-Crispo, amico Senecae (cf. Anth. Lat. nr. 405 et 445), cogitaverat, sententiae refragatus Crispum Crinagorae esse *Sallustium Crispum*, quem ex compluribus Taciti et Plinii locis atque ex Hor. sat. I 2, 48 et c. II, 2 affatim novimus, cuius immensae divitiae et magna apud imperatores auctoritas saepius commemorantur. — Quo accedunt quae Jahnius et eius sententiam qui amplificat et corrigit, Zangemeisterus in Herm. vol. II de hoc carmine disseruerunt. Egrege enim, ut v. d., quem ultimo loco laudavimus, demonstravit (p. 469 sq.), locorum descriptio convenit, siquidem Vitruvius (III 2, 2) testis est fana *Trium Fortunarum* (Τρίσσαι Τόχαι) proxime fuisse portam Collinam itaque etiam hortos Sallustianos (Tac. hist. III 82), quos Crispus ab historico hereditate acceperat. Ad Horatianum quoque carmen illustrandum paullulum lucramur epigrammate subsidio arcessito, id quod usque ad Kiesslingium neminem editorem fecisse mirum est. Namque ex quarto versu discimus Sallustium non modo divitem fuisse et eximia potentia floruisse, sed etiam praestitisse maxima in amicos liberalitate et benevolentia. Quod si verum est, Schützii et eorum qui eum sequuntur, sententia de Crispi aviditate<sup>1)</sup>, quae dubito an Horatii versibus niti nequeat, penitus corrui. Nostra autem multo pluris interest constituere, quis Caesar ille fuerit, per quem ut altius etiam (μείζον) evehatur Crispus, optat poeta, Augustus an Tiberius. Ut ex Taciteis locis elucet, imprimis apud Augustum eximia potentia pollebat, ita ut „incolumi Maecenate proximus, mox praecipuus, cui

<sup>1)</sup> Haec enim annotat: „Eine gewisse Andeutung seiner Habsucht und Verschwendung lässt sich auch hier nicht verkennen.“

secreta imperatorum inniterentur“ a scriptore (ann. III 30), qui qua solet brevitae et perspicuitate indolem et mores Sallustii depingit, iure nominari potuerit. „Aetate autem provecta, fato potentiae raro sempiternae“ ut Tacitus opinatur, fortasse autem, invisus factus „ut particeps secretorum“ (ib. I 6) de Postumo Agrippa, „speciem magis in amicitia principis quam vim tenuit.“ Quod si ad initum cursum nos revocantes anquiramus iam, quo potissimum imperatore poeta illud votum conceperit, vix dubium est, quin Augustus intellegatur a poeta, non Tiberius, quo imperante Sallustio „iam nihil reliquum erat, quod cuperet,“ quo imperante Sallustius admodum senex a. 773 mortuus est. Neque igitur hoc epigramma ad Tiberii regnum revocari potest, neque omnino certum temporis indicium continet<sup>1)</sup>, ha ualiter atque illud de Nicia poema. — Quod contra utrumque asserendum est de eo, quod ultimum examinaturi sumus, quod proxime<sup>2)</sup> eorum, quae aetatem tulerunt, epigrammatum abesse videtur ab Crinagorae obitu:

*ep. 31.<sup>3)</sup>*

Summis laudibus res a *Germanico* contra Germanos<sup>4)</sup> gestae praeclarissime extolluntur atque amplificantur. Alpes et Pyrenaei montes invocantur, qui testes essent radorum, quos Germanicus fulminasset. Confertos corruisse barbaros, iam Enyo atque Martem suam vim debere Germanico. Ei qui Crinagoram sub initium regni Tiberii iam mortuum esse censent aut reversum in Graeciam (?), hoc carmen referunt ad Drusum Germanicum. Quorum sententiam antehac ego quoque amplexus eram propter descriptionem regionis, quae non quadraret ad Germanici expeditionem, propter nimiam adulescentuli adulationem, postremo propter ep. 49, quod cum hoc epigrammate ita putaveramus conexum esse ut Horatii carmina IV, 4 et 14, cum poeta altero Tiberium (quo fortasse non minus familiariter usus esset quam Parthenius), Drusum altero celebraret. Hanc opinionem Momm-

1) De *re metrica* illam sententiam adiuvante cf. p. 44.

2) Sed vide p. 21.

3) Id falso Lollio Basso Plaundes assignat, cf. notam.

4) *Κεῖντοι* nominati sunt de more.



senus prorsus mihi expunxit ea re, quod nullo modo poema ad Drusum Germanicum<sup>1)</sup> iam defunctum spectare posset, sed vivum celebraret. Quod vero ad nomina geographica attinet, mira sane sunt, neque tamen minus mira, si prius bellum intelligitur<sup>2)</sup>. Perinde errabam de adulatione nimia, quam carmini subesse statuebam. Nam minime haec praedicatio indigna est expeditionibus, quales fuerunt annorum 768 et 769. Hac enim ex parte cum viro doctissimo conspirare non possum, post a. 764 epigramma compositum esse autumante, quo sane iam imperii particeps Germanicus erat, sed una cum Tiberio (Mommseni H. R. vol. V, p. 45). Neque vero quidquam praeclari aut notabilis eo anno factum auctores exhibent, immo Romani parum impigre et strenue se gerebant. Quodsi nihilominus Crinagoras illum in modum laudes Germanici ob res eo anno gestas caneret, iure sordidissimus assentator appellandus esset, quo crimine non magis mihi videtur accusandus quam ipse Horatius. Epigramma igitur, de quo agimus, p. a. 767 concinnatum est — atque ut indicia temporum iam breviter comprehendamus cuncta:

Crinagoras post a. 767 mortuus est Tiberio imperatore. Quot annis post hoc acciderit, erui non potest, quamquam non ita multi ei circumacti sunt, qui iam ante a. 712 poesin temptavit atque ante annum 729 Romae versabatur, ut carmen ad Philostratum pertinens iam in urbe ca. a. 724 compositum esse possit (et *Menippi periplus* ante hunc terminum collocandus sit), porro ei, qui — ut testimonia quoque repetam — unus ex prioribus Philippi Coronae poetis nominandus est, qui denique aequalis et amicus fuit Parthenii, quem multo ante Tiberii regnum mortem occubuisse Meinekius ostendit. Haec sunt omnia, quae caute epigrammata interpretanti de Crinagorae aetate constant. Accedit id quod de migratione Lesbo in Italiam suscepta supra nos comprobare studuimus. Qua vitae conditione usus sit, coniectura nullo negotio assequi possumus: verisimillimum est hunc

<sup>1)</sup> Post decessum ex vita Drusum hunc titulum accepisse Suet. Claud. c. 1 et Dion. 55,2 auctores sunt.

<sup>2)</sup> Vide tamen ne *Celtarum* significatione excusentur. (cf. notam.)



Graeculum inagistri munere functum esse, fortasse vel Octaviae liberos erudisse.

Jam quaerentibus nobis, quomodo fieri potuerit, ut Crinagoras, ignobilis ceteroquin Mytilenaeus, ad hunc vitae statum evectus illustrissimam gentem Octaviae necessitudine quadam contingeret, non dissimulaverim, quamvis dubitanter enuntiem, coniecturam quandam, quam de hac re animo concepi.

Supra (p. 4) *Theophani* historico quantum Mytilenaei debuerint, significavimus. Quem non modo libertatem eis impetrasse a Pompeio, sed etiam alio modo profuisse testantur et Strabonis verba (XIII p. 617.): καὶ πάσας συγκατάρθωσεν αὐτῷ (sc. Πομπηίῳ) τὰς πράξεις, ἀφ' ὧν τὴν τε πατρίδα ἐκόσμησε, τὰ μὲν δι' ἐκείνου, τὰ δὲ δι' ἑαυτοῦ, et Taciti (ann. VI c. 18): „defuncto Theophani caelestes honores<sup>1)</sup> Graeca adulatio tribuerat“, et inscriptio in Dittenb. syll. nr. 260: .. φιλοπάτριδι Θεοφάνη, τῷ σωτῆρι καὶ εὐεργέτῃ καὶ χτίστῃ δευτέρῳ τῆς πατρίδος. (cf. Mitt. d. arch. Inst. in Athen 1884 p. 87); etiam poesin in eius familia cultam esse comprobatur exemplo M. Pompei Iunioris. Nonne igitur consentaneum est hunc virum eiusque posteros qui similiter apud imperatores multum auctoritate valebant (cf. p. 4), populares adiuvisse omni modo, si Romam venissent, vel ut eo se conferrent compulsi? Nonne fieri potuit, ut Crinagoras, vir non vulgari ingenio, item eorum liberalitate et humanitate usus Romam provectus eam conditionem vitae nancisceretur, quam supra descripsimus?<sup>2)</sup> Atque si ipsos non adierit, tamen eorum exemplum eum secutum, eorum auctoritate permotum Romam migrasse dicendum erit.

---

<sup>1)</sup> cf. nummos cum epigraphe: Θεὸς Θεοφάνης Μυτ. Mionnet. III. p. 47. nr. 108.

<sup>2)</sup> ep. 810 apud Kaibelium si deberetur M. Pompeio Juniori, ad hanc sententiam firmandam non paululum faceret.

### Mantisa Variana.

Mantisae loco fusius disserere non pigebit etiam de duobus eis epigrammatis, quorum causa Mommsenus libello, quem saepius iam laudavimus, appendicem de Crinagora adiecit. Ac primum quidem de

#### *epigrammate 33*

v. d. assentior eatenus, ut clade quadam a Germanis accepta id excitum esse putem. Profecto egregie et melius quam ex scriptorum narratione, si qui eundem casum rettulerint, hinc elucet, qualis Romae tum fuerit habitus animorum, quam graviter nuntio illo funestissimo concussi sint. Sed si certam occasionem epigrammatis illius ingenium vere poeticum proidentis circumspectamus, non ad cladem Varianam cum Mommseno decurrerimus, sed ad expeditionem *Germanici* anno 769 susceptam (cum *Johnsonio* in *Boschiana* ed.), qua ex tempestate summa calamitas ac paene perniciēs Romanis exorta est. Neque enim translate de populis ad Oceanum habitantibus primum versum accipimus, sed de infesta *Oceani* ipsius vi, cui commode subicitur periculum a Germanis impendens, si Rheno epoto (*ἄπαντα*) in imperii Romani fines facile penetrare possint. Id autem nihil nociturum esse Romanis, quamdiu fideles esse perseverarent. Caesari (*Tiberio*, non *Germanico*, ut *Johnson*. dicit). Et recte vaticinatus est *Crinagoras*; id illustratur *Taciti* verbis, quibus quam celeriter Romani se collegissent eodem anno, clarissime describit, cum Germanos praedicantes facit (ann. II 25): „invictos et nullis casibus superabiles Romanos, qui *perdita classe*, amissis armis, post constrata equorum virorumque corporibus litora eadem virtute, pari ferocia et velut aucti numero inrupissent.“ Item paulo aliter ac Mommsenus sentio de

#### *epigrammate 24,*

quod ad eandem cladem vir doctissimus referri vult. Carmine non exiguis vitiis traditionis implicato, quorum maior quidem pars feliciter a *Jacobsio* sublata sunt, miles quidam *Italicus* celebratur, qui fortitudine sua *aquilam* exercitus servavit. Omnium temporum fortissimos heroes poeta invocat, coram quibus facinus bellatoris illius laudaturus est. Quem cum

iaceret ad *Rheni* ripas vulneribus paene confectus atque aquilam exercitui ereptam vidisset a barbaris, exsiluisse rursus ex strage mortuorum et occiso eo, qui illam ferebat, ducibus restituisse. „Huic soli“ sic elegantissime, ut assolet, Grotius vertit, „licuit vincere dum moritur.“ Simile facinus refertur a Floro (II 30) his verbis: „Signa et aquilas duas adhuc barbari possident, tertiam signifer priusquam in manus hostium veniret, evolsit mersamque intra baltei sui latebras gerens in cruenta palude sic latuit.“ Hac Flori narratione commotus v. d., cum alii bello carmen adscribi non posset, non modo simile, sed idem factum ab utroque indicari concludit. In universum sane largiri nobis licet quod Crinagoras celebrat, facinus in pugna Teutoburgiensi commissum esse, etiamsi locorum descriptio ne hoc quidem in epigrammate quadret ad cladem illam. Porro cum versus quintus, quo de una tantum aquila sermo est, ceterae omittuntur, non magnopere faveat ei sententiae, ultimus versus non abhorre videtur a pugna Variana. Quam quidem intellegere nos ut nihil cogit, ita nihil prohibet magnopere. Flori autem capite in auxilium vocato nova lux certe non affulget Crinagorae carmini. Immo id unum consentiunt, quod uterque aquilam militis virtute ab hostium manibus defensam tradit, in reliquis discrepant quam maxime. Unde apparet, quamvis hoc deneget Mommsenus, ad aliud bellum epigramma revocari posse: res ea, quam ille canit, tanti momenti non erat, quod iam Brodaeus percepit rectissime, ut ab unoquoque illorum temporum scriptore eam relatum esse oporteat. Nos igitur etiamsi Mommseni sententiam probabilitate non carere concedimus, tamen carmini illam pugnam locum *necessario* fecisse diffitemur.<sup>1)</sup>

At ut demus plus, quam dandum est, veram esse Mommseni explicationem, quo modo Flori et Crinagorae narrationes conciliari possunt inter se? *Nullo* existimo alio nisi hoc, ut utrumque rem non factam, sed fictam aut rumore saltem exaggeratam referre dicamus. Cui sententiae tres opitulantur causae: primum quod nemo scriptor, a Floro si discesseris, rem

---

<sup>1)</sup> de *re metrica* parum istam opinionem commendante vide p. 40.

tanti, si cladi Varianae tribuatur, momenti neque spernendam fido auctori praesertim Romano commemoravit, immo Dio etiam tertiam aquilam in hostium manus incidisse indicat l. 60 c. 8, quocum l. 57 c. 18 conferendum est; deinde quod Florus omnino incertos auctores secutus esse videtur, ut verba „adhuc barbari possident“ ostendunt; tum quod — idque gravissimum — ad eiusdem fabulae exemplum effectum est, quod Silius Italicus bello Punico secundo atque id pugnae ad *lacum Trasimenum* commissae vindicavit; haec enim de Bruttio milite Romano, narrat l. VI

v. 15 Nec tamen adversis fuerat fracta Itala virtus.

v. 25 Inde honor ac sacrae custodia Marte sub omni

*Alitis*; hinc causam nutrit gloria leti.

Namque necis certus, captae *prohibere nequiret*

Cum Poenos aquilae, postquam subsidere fata

Viderat et magna pugnam inclinare ruina,

*Occulere* interdum et terrae mandare parabat.

Sed subitis victus telis labentia membra

Prostravit super atque iniecta morte tegebat.

Verum ubi lux nocte e Stygia miseroque sopore

Reddita, vicini de strage cadaveris hasta

Erigitur soloque vicens conamine late

Stagnantem caede et facilem discedere terram

Ense fodit clausamque aquilae infelicis adorans

*Effigiem palmis languentibus aequat arenis.*

Supremus fessi tenues tum cessit in auras

Halitus et magnam missit sub Tartara mentem.

Quamquam multa variata sunt, tamen non uno nomine haec expositio ceteris consimilis est. Quid veri his fabellis subsit, eruere difficillimum est. Tales vero narratiunculae ab aliis aliter exornatae post maximam quamque victoriam<sup>1)</sup> et cladem exortae libentissimeque exceptae celerrime dissipantur, ut horum quoque temporum memoria luculenter demonstratur.

---

<sup>1)</sup> *Grotius* (in praefatione) cum hoc epigrammate confert quod Dio (68,14) de equite quodam refert, qui simile viri fortis facinus edidisset.

## II.

### De Crinagorae elocutione et dialecto.

Justam de elocutione Crinagorae disquisitionem hoc loco exhibere ideo supersedemus, quod in verborum indicem, quem opusculo adiunximus, ut in horreum omnia insigniter dicta referre conati sumus ac simul, cur singularia ea essent, breviter indicavimus. Itaque satis sit hoc in capite in universum pauca de stilo poetae disseruisse. Ac primum id neminem, qui his epigrammatis vacaverit, praeteribit sermonem poetae Mytilenaei colorem *epicum* praeferre in verbis eorumque formis atque in structuris grammaticis.<sup>1)</sup> Quamquam igitur oratione utebatur non insita, sed assumpta, „non ex ore hominum viventium, sed ex libris studio et labore accepta“ (Jacobs. praef. p. XLIII) tamen summa cum sollertia eam in usum suum convertebat; unde profectus recte Bährus (l. l.) colligit poetam diligenti eruditione (et lectione veterum et Alexandrinorum poetarum, cf. epp. 41 et 29) imbutum esse, qua ceteris poetis illorum temporum excelleret perinde atque alia poetica virtute, quam optime vir doctissimus *eine gewisse Gediegenheit seiner Poesie* appellasse mihi videtur. Quae humanitas planissime comparet etiam in eis vocibus, quas novas poeta finxit (28 in 274 versibus) aut nova structura induit aut denique in epico thesauro penitus absconditas carminibus adhibuit et reviviscere iussit. In his grammaticus Mytilenaeus saepius vel felicissime versatus est. Quod studium nova et insignia vocabula versibus inserendi non raro sane fatale fuit poematis ipsis imprimis eis, quae ἀναθηματικά vocantur. Hic quoque saepe „simplici et apertae viae implicationes calles praetulit“ (Jac. p. LXIX), saepe tam argutus est quam obscurus, ad legendum non venustus, dictione quam usurpat minime expeditus. Id autem commune horum poe-

---

<sup>1)</sup> Sic articulum ex Homérico usu saepe omittit aut *demonstrativa* strativa vi succingit, cuius rei non semper, quae par erat, ratio ducta est, idem de *tnesi* dicendum est frequenter adhibita, haud raro non respecta a viris doctis.

tarum vitium erat, quod Crinagorae magnopere exprobrare non licet. Acerbius igitur quam aequum est Kaibelius in Philodemi editione hunc poetam contemptim „magnae illi rhetorum turbae, stili et artis incuriosae“ annumerat. Quod iudicium eo magis miratus sum, quod observatio ea, unde proficiscitur v. d., Crinagoreis exemplis omnino non fulcitur. Hæc enim particula epica Alexandrinos et politiores poetas semper dicit abstinuisse; nam magnam illam rhetorum turbam, qui scilicet hanc regulam non observabant, se nihil morari; eos numero poetarum eximendos esse. Ut iam dictum est, hæc acrior censura ipso eo indicio, quod allegaur, confirmari non potest, quia nusquam apud Crinagoram ἤδὲ legitur, nisi forte Kaibelius rationem Jacobsii probat, qui volebat sine causa bis (epp. 42 et 51) eam particulam in textum coniectura invehere. Sane in ep. 6,5 ἤδὲ particula legitur, quae in eodem genere ducenda est; sed carmen, ut alio loco demonstrabimus, suppositiciū est. Neque maiore successu idem v. d. (Herm. vol. XVII. p. 423) „notum artificium Alexandrinorum, quo praepositionem ad plura substantiva applicandam ultimo nomini adiciunt“, Crinagorae ut aequalibus poetis abiudicat: nam difficilius mihi videtur ep. 34,1 accusativum μόχον ex ἑλθῃ pendere malle quam praepositionem supplere. Immo etiam altero loco (ep. 40,2, cf. notam) eandem structuram Cr. adhibuisse videtur. — Jam priusquam ad dialectum nos convertamus, duas res strictim attingere placet. Ad ep. 48 Geistius annotavit ex lusu, quo poeta verbo Τόχαι et deas et latinum „fortunas“ significaret, Crinagoram colligi posse non imperitum fuisse *latinae* linguae. Hoc nemo certe negabit, qui reputaverit non modo cum ceteris Graecis poetis et rhetoribus Romae Crinagorae per longum vitae spatium consuetudinem fuisse, sed etiam cum Romanis. Itaque neutiquam mirum indicarem, si latinam orationem hic illic ad Crinagorae sermonem conformandum aliquid contulisse appareret. Huius autem rei vestigium exstat revera et in illo epigrammate et in epp. 4 et 5, ubi ἀπὸ θυμοῦ πλείονος et ἀπ' οὐκ ὀλίγης φρενός latinam phrasin „ex animo“ reddunt.<sup>1)</sup> Quibus indiciiis

<sup>1)</sup> consilio ep. 37,3 reticui, ubi θάνατος pro corpore item ac lati-

fretus non dubito Heckeri coniecturam ὁ πᾶς ἐπὶ σοί (cf. ep. 1,6) in epigrammatis 5 versum sextum inferre, qua quidem latinum *totus tuus* egregie refertur. — Utique vero latinus sermo maiorem vim habebat quam *patria* dialectus, cuius unicum vestigium deprehenditur in ep. 36,7: τερένης, quam Aeolicam formam recenset grammaticus quidam (Cram. An. Ox. I, 413; cf. Bergk. ad Alcaei fr. 61: τέρενας ἄνθος ὀπώρας) his verbis: πῶς ἡ τέρενα εἴρηκεν; καὶ ἔστιν εἰπεῖν, ὅτι ἀπὸ τοῦ τέρεν ἡ γενικὴ τέρενος, καὶ μετὰγεται ἡ γενικὴ εἰς εὐθείαν ὁ τέρενος, ἀπὸ τούτου θηλυκὸν τερένη καὶ Αἰολικῶς.<sup>1)</sup>

His expositis redeamus ad id unde digressi sumus, ad epicum sermonem, quocum concinere diximus *dialectum epicam*. Eam non aliis formis Crinagoram temperasse primum hoc loco monendum est. Quae aequalitate, ut consensu indicaverunt Baehrius et Geistius, mirum quantum ceteris Anthologiae poetis excellit. Haec quoque virtus ex diligenti, qua imbutus erat, eruditione manasse videtur. Nam plerique poetae „in hac re aurium iudicio plus aliquanto quam severis grammaticorum praeceptis tribuerunt atque diversarum dialectorum formis callide coniunctis caverunt, ne aut crebra eorundem sonorum iteratione aures onerarentur, aut dorico πλατειασμῷ elegiaci numeri nimium gravarentur, aut mollioribus ionismi formis nimium enervarentur.“ (Jac. p. XLV) Certum igitur consilium secuti epicae dialecto doricās formas inserebant poetae atque ex contrario. Hac vero ratione ea carmina destituta sunt, quorum epica species turbatur, si vel una attica aut dorica forma immiscetur, praesertim in eo poeta, qui ceteroquin summa constantia<sup>2)</sup> atque arte quadam epicum colorem sectatus est.

---

num *mors* (vide supra „iniecta morte tegebat“, Prop.: „mors mea nixa toro“) adhibitum est; nam ep. spurium duco. De Σκυλοφόρος = *Feretrius* (ep. 11) cf. caput quartum.

<sup>1)</sup> Vide R. Meister *Die griech. Dial.* I p. 147.

<sup>2)</sup> Uni epigrammati 20, quod *suppositum* esse credit Geistius, exceptionem dedi, cum duae quae ibi leguntur formae doricæ: κήγῳ, ἀγγιτῆρσιν consulto propter bucolicam carminis indolem quaesitae esse videantur.



Proximum igitur est, ut quae ex illa ratione correctiones flagitentur, in unum componam:

1) ep. 8,5, ubi suo iure Geistius pro ἐκυρά ἐκυρή restituendum arbitratur.

2) ep. 14,6 Κριναγόρου in cod. legitur. Hic exitus ab Crinagorae sermone abhorret, cum alibi semper eos genitivos in εω desinentes conformaverit: ep. 9,6 Ἑρμέω; 25,3 Νικίεω; 36,1 Ἀράξεω. Praeterea poeta se ipse Κριναγόρης (ep. 10,4; 5,6), in quinto casu Κριναγόρη (ep. 2,2) recte appellavit. Quod vero in epigrammate subditivo 16,7 Εὐνικίδαο legitur, inde id probatur luculenter imitatore non legisse in epigrammate vere Crinagoreo 17,5 Εὐνιδίου, ut nos, sed Εὐνικίδεω. Jam ut ad ep. 14,6 revertamur, Κριναγόρου eo in textum irrepsit, quod scriba paulo ante in lemmate legerat (non exaraverat, cf. apparatus crit.) eandem formam. Quamobrem poetae reddamus, quod ipsissimum est, rectam nominis formam Κριναγόρεω.

3) Saepius crasis a scribis in pravum detorta est, sed epicam rationem Crinagoram ascivisse Planudes testis est, qui ep. 47,5 recte servavit χάν. Ad hoc exemplum cetera correximus.

In horum versuum communionem addendi etiam sunt:

4) ep. 32,2, ubi εὔραο corrigo in εὔρεο, ut recte traditur 27,5 μετέρχεο; 43,5 λάβεω (non λάβεν); 44,3 ῥέω.

5) ep. 3,1, ubi cod. ἐν αγκάς, editores ἐνέγκας, Heckerus ἐνεγκών exhibent, scribe ἐνείκας, item ἐνεικάμενος 1,4 et 29,4.

6) ep. 40,1 P: τέτταρσι, quod Pors. in τετόρεσσι, nos in τέσσαρσι correximus.

7) Cum ep. 29,4 κάλλεος P praebeat, 17,7 κακοσκήνεος cum alibi *semper* formas horum nominum non contractas praeoptaverit poeta, etiam ep. 2,2 λέχεος pro λέχους scribendum esse iudicavi.

8) ep. 42,4: ὄφει P, corrigo ὄφη, cf. notam.<sup>1)</sup>

---

<sup>1)</sup> Nonnulla quae ad elocutionem poetae spectant, etiam in proximis capitibus tangemus.





### III.

#### De re metrica Crinagorae.<sup>1)</sup>

##### A. De pentametro nonnulla.

1. Acute Kaibelius<sup>2)</sup> animadvertit epigrammatographos meliores quidem maximam operam, curiosissimum studium in versibus quam venustissime concinnandis collocasse, ut tamen lectores potius eos placere persentiscerent, quam cur placerent. Quamobrem si in arcana artis eorum nos insinuare vellemus, opus esse acerrime in versuum indolem, singularum sedium rationem inquirere, itaque regulas, quibus poetae adstricti essent, patefacere. Proficiscitur vero v. d. a Callimacho, „omnium politissimo et accuratissimo numerorum artifice,“ cuius hexametri sedatiore ingressu exorsi eundo tamquam crescentes summa celeritate exitum peterent. Pentametri autem naturam ita tulisse, ut, ne cursu solutiore praecipitarentur numeri prioris partis — nam altera non potuit nisi dactylica esse — crebriores essent duo spondei vel singuli spondei dactylique (ss vel ds, rarior forma sd videtur esse sec. Hultgrenum) quam bini dactyli, quos rarissime ille sibi indulsisset. Tam severas leges poeta Mytilenaeus in parte certe epigrammatum non sibi scripsit; inveniuntur enim in centum triginta septem pentametris versus spondeis carentes septendecim<sup>3)</sup>, quos quidem semper eum incisionibus mollivisse notandum est sicut

---

<sup>1)</sup> Adhibui ad has quaestiones praeter *Jacobsii* de hiatu disputationem (in *Addendis ad praefationem*, vol. III. p. XIX sqq) et *Hermanni* „*Epici versus historiam*“ (Orph. p. 687 sqq.) haec vv. dd. scripta:

3. *Kaibeli* Observationes critt. in A. G. (Comm. phil. in hon. Mommseni. p. 326 sqq.)

4. *Eiusdem* Philodemi Gad. epigrr. (Index Gryph. 1885).

5. *G. Meyeri* Zur Gesch. d. griech. u. lat. Hexameters (Acta Acad. Bav. 1884).

6. *Fr. Benekii* Beiträge z. Metrik d. Alexandriner. Progr. 1883. Bochum.

7. *Hultgrenii* Observatt. metr. in poetas elegiacos. Lps. 1871. Progr.

<sup>2)</sup> In commentatione tertio loco recensita.

<sup>3)</sup> Nullum fere exemplum in *posterioris* aetatis epigrammatis exstat.

σχήπτρα καὶ αἱ βασιλέων; σὸς δὲ νέκος φαφαρῆ (ep. 23. ca. a. 724 scriptum). Nam si una tantum caesura inciditur prior pentametri pars, ut hoc schema existat:  $\underline{\text{—}} \text{ } \text{—} \text{ } \text{—} \text{ } \text{—} \text{ } \text{—}$ , iam initio versum nimis praecipitari et miserrimos numeros prodire quivis persentit. Et profecto non modo a Meleagreae, sed etiam a Philippicae coronae poetis illam formam diligentissime evitatam esse cognovimus nuper, cum hanc rem anquirebamus. Nam apud *Callimachum* nullum exemplum inveni; *Leonidas Tar.* (95 epp. in Brunckii Anth. Gr.<sup>1)</sup> recensentur) duo exhibet: 59,4; 91,10 (A. P. VII 67; VII 295.); *Ant. Sidonius* (350 disticha cum Meyero respicimus) quattuor, ex quibus duo in nominibus propriis: 12(?),2 (A. P. VI 10); 18(?),6 (A. P. VI 115.); 34(?),6 (A. Pl. 176); 68,4. (A. P. VII 6) — ultimum exemplum tantum certum est; *Meleager* (128 epp.) tria: 11,4 (A. P. XII 56); 38,2 (ib. 110); 112,6 (VII 195). *Antipatri Thessalonicensis*, cuius duodeseptuaginta epigrammata apud Brunckium leguntur, unum illius schematis invenimus exemplum: 20,6 (A. P. IX 297) πρῶτος ἀνερχομένῳ, quae verba non arte coniungenda sunt, ut in ceteris exemplis; unum in *Philippi* epigrammatis elegiacis undequadraginta: 7,2 (A. P. VI 99): Πᾶνα φιλοξενίδης, cui versui nominibus propriis satis excusationis praebetur; unum in *Antiphili* Byzantini carminibus quinque et quadraginta: 33,3 (A. P. VII 622.): σχοῖνον ἀνελχομένῳ, quorum verborum prius ad versum antecedentem spectat; duo obviam fiunt in *Leonidae* Alexandrini epigrammatis quadraginta tribus: 43,2 (A. P. VII 548 n. pr.) et 35,4 (A. P. IX 354): θνήξομ', ἀπωσάμενος — unum praeterea in *Parmenionis* Macedonis quindecim, duo in *Diodori* Sardiani sedecim, unum in *Apollonidae* Smyrnaei undetriginta epigrammatis legitur eiusmodi pentametri exemplum; ne unum quidem praestant in carminibus, quae Brunckii recensionem experta sunt, *Alpheus* Mytil. (11); *Philodemus*

---

<sup>1)</sup> Commodo nostro nos ea editione usos esse ingenue profiteamur; sed nemo postulare potest, ut singula epigrammata ex Anth. Pal. operose excerpamus. Omnia igitur praestare non possum; fortasse futurus Anth. editor aliquo modo illi incommodo subveniet.

(34); *Bianor* (19); *Lollius Bassus* (11); *Antiphanes Macedo* (9); *Automedon* (11); *Addaeus* (10); *Maecius* (11); *Marcus Argentarius* (33); *Statyllius Flaccus* (12). Ad Crinagoram iam nos convertamus, qui bis in centum triginta septem pentametris illam libertatem sibi sumpsit:

ep. 9,6: ἱερὰ τ' ἀγρευταῖσι γερανδρύου ἀρκεύθοιο

πρέμνα, λιθηλογέες θ' Ἑρμέω ἰδρύσεις,

ubi duo verba initialia ad diversa distichi membra pertinent, alterum ad hexametrum, alterum ad pentametrum, et ep. 24, ubi v. 6 vox ἀρηϊφάτων memoria Homerica orta talem pentametrum effecit simulque ei satisfactionem conciliavit. — In aperto igitur est hunc poetam ut ceteros epigrammaticos tali verborum consociatione, qua versus numeri confringuntur, diligenter abstinuisse neque licere coniecturis vel falsa potius litterarum, quae traditae sunt, compositione<sup>1)</sup> ei hanc licentiam obtrudere. Sed tamen hoc factum est a vv. dd., qui ep. 3,4 traditam scripturam θῆκεν ὁμωνυμῆ commutarunt in θῆκεν ὁμωνύμιος παῖς πατρός Ἀντιφάνης. Filium significaturus est Cr. patri cognominem, quod enuntiare potuit simpliciter sic: πατρός τοῦνομ' ἔχων, vel οὗ πατρός ὁμώνυμος (υἱός) vel πατρός ἔχων ὄνομα, ut in inscriptionibus nonnullis institutum est, vel ut Anyte A. P. VI 153: Κλειτόριος, γενέτα ταῦτό λαχὼν ὄνομα vel ut Ant. Sid. ib. 206,9: πατρός Ἀριστοτέλους συνομώνυμος. Cui apertiori viae Cr. ut saepe implicatam praeoptavit studio, quod supra adumbravimus, commotus versus rarioribus vocibus distinguendi. Ex eo enim numero poetis est ὁμωνυμῆ,<sup>2)</sup> quod verbum etiam in ep. 18,2 occurrit. Quaerendum igitur est, nonne hoc loco illud vocabulum poetae recta traditione vindicetur. Mihi quidem dubium non videtur esse, quin ὁμωνυμῆ solum nulla praepositione addita idoneum sensum suppeditet, siquidem παῖς nulla re in textum irrepsit nisi patris mentione, quod idem evenit in Aesch. Agam. v. 315, ubi, ut nuper me

<sup>1)</sup> Hoc nescio an inscius vitarit Meinekius, cum A. P. VI 298,6 (item atque VI 293,2) rectissime scriberet: σκῆλ' ἀπὸ Σωχάρεος.

<sup>2)</sup> Est terminus Aristotelicus notissimus cf. Indicem Bonitzii s. v.; „ergo fortasse ex scholarum usu arripuit ludi magister“ (Dielsius).

docuit Vahlenus, παῖδες, per se ipsum non necessarium, tamen ad sententiam complendam et ampliandam voci γερόντων additum est. Quae cum ita se habeant, sensus eorum verborum, quae codex exhibet, non flagitat correctionem, flagitat autem metrum. Nam si θῆκεν ὁμωνυμίῃ legimus, molesta ea bisyllabi et quinquesyllabi coniunctio oritur. Immo tria verba in traditione obli-tescunt: θῆκεν ὁμωνυμίῃ, ut iam Beissonadio placuit, quamquam non recte interpretatus est „θῆκεν Ἄ., παῖς ὢν ἐν ὁμωνυμίῃ πατρός“, immo ἐν ὁμωνυμίῃ continuo cum πατρός copulandum est, cum verbum, quod est παῖς, non nisi ut πατρός contrarium esset, poeta interposuit. Itaque vv. dd. conamina, ὁμωνύμιος Jacobsii vel ὁμωνυμίου Heckeri, non modo sensu non postulantur, sed etiam metricae legi refragantur, quandoquidem adi. ὁμωνύμιος artissime cum θῆκεν coniungendum licentiam excusaturo nullam latebram praebet.

2. Meyerus disputatione sua (cf. p. 28, adn. 1,5) optime de re metrica meritis est, cum multas leges adhuc incognitas, sed severe ab poetis Alexandrinis observatas aperuit. In eis de pentametro quoque regula quaedam maximi momenti detecta multisque exemplis illustrata est. Nam primus Meyerus ostendit non licere priorem pentametri partem exire in verbum *iambicum*, quod vix par esset caesurae versus gravissimae. Callimachus, ut hoc uno exemplo utar, in 205 pentametros duos intulit illum in modum conformatos; uterque autem satis excusatur, alter nomine proprio (A. P. VII 89, 16 Δίῳν, quae lectio etiam hinc stabilitur), alter (V 6,2 φίλον) rhetorico quodam consilio. Non minus severe eandem regulam observavit Crinagoras, quippe qui in centum triginta septem pentametris nullum illius formae admisit, si excipias ep. 45,8: νῦν ἄκελευστος ἅπας ὄρνις ἀναχρέκεται et ep. 19,2: Μῆνη, πένθος ἐὼν νυκτὶ καλυφάμενη. Quamvis libenter haec laesae regulae exempla Crinagorae largiremur, tamen in priore versu verisimilius est iambicum exitum scribae deberi, qui ex v. 5: ἔδραμε δ' ὠκυδίδακτος ἅπας οἰωνὸς ἐρίζων temere ultimum interpolavit, praesertim cum sic epigramma pentametro spondeo carente liberetur. Alter autem pentameter ideo notabilis est, quod si vera esset Geistii et Woltersii coniectura, in epigrammate

legeretur a. 750 scripto. Nos nimirum in contrariam partem ratiocinamur. — Unum legis violatae exemplum exhibet — id quod memorabile est — id carmen, quod iamdudum aliis de causis (cf. caput quartum) suppositum esse existimaveramus, 37,6 ἀθρήσας, τί πλέον φειδομένῳ βίῳ. Neque modo idcirco exceptio notatu digna est, quod in insiticio epigrammate legitur, sed etiam aliam ob rem. *Antiphilus* enim, cui Planudes iure epigramma inscripsit, illius legis omnino respectum non habuit, nam in quadraginta quinque epigrammatis non minus *duodecies* eam laesit. Hac observatione Planudi fidem augeri magnopere diserte monere vix opus erit.

## B. De hexametro.

### 1. De hexametri osteologia<sup>1)</sup> et singulorum pedum indole.

Inter sedecim, quae concinnari possunt, hexametri formas (quintum et sextum pedes non respicimus consilio), Crinagoras non aliter ac ceteri poetae maxime favit his schematis:

dsdd (triginta versus),

dddd (duodeviginti),

sddd (tres et viginti),

ssdd (quindecim).

Neque tamen consistebat intra ea, sed ex sedecim illis omnino *quattuordecim* in usum suum contulit; semel etiam rarissima forma sdss usus est in ep. 33,1: Οὐδ' ἦν Ὀκεανὸς πᾶσαν πλήμυραν ἐγείρη, ubi spondeis cumulatis sensum optime adaptasse mihi videtur. Non minus rara est ea forma, quae ep. 8,1 usu venit: dsss (Ἥρη, Ἐληθυῶν μήτηρ, Ἥρη τε τελείη). Ibi quoque sensus clare externa forma illustratur, cum sollemniter Hera invocetur. — In hoc versu caesuram *seminonariam*: Ἥρη, τε τελείη spondeus antecedit, sed hoc licet. Contra illicitus est spondeus *diaeresi* succinctus, ut *bucolica* caesura inse-

<sup>1)</sup> „Osteologiam eam disciplinam metricam Dobrischius („Ein statistischer Versuch über die Formen des lat. Hex.“ 1861) apte appellat, qua singulorum pedum ratione habita, quomodo dactyli spondeos et hi illos excipiant et quantus utrorumque numerus sit, exacto iudicio examinatur“ Hultgren. l. l.

quatur. Tales versus Crinagoram non conformasse non mirum est, magis mirum neque exiguae artis indicium, quod ante bucolicam caesuram diligentissime omnem spondeum declinavit, id quod ne Callimachum quidem tam severe instituisse Meyerus testis est. Unum exemplum obstat, quo si codici fidem adiungere licet, eam legem exiit Crinagoras: ep. 29,1 λυρικῶν ἐν τεύχεϊ τῷδε. Sed in promptu est addita una hasta (ἐνὶ) normae satisfacere.<sup>1)</sup>

Hoc de osteologia hexametri imprimis disputandum erat; iam nonnulla tractemus, quae cum hoc et insequenti capite coniunctionem habent et facillime ad caesuras disceptandas aditum nobis parient. Initium vero apte sumere possumus a primo Iliadis versu: Μῆνιν ἄειδε, θεά, Πηληϊάδεω Ἀχιλῆος, quem quidem non omnes scient tres ob causas displicere debuisse posteriorum temporum poetis politioribus. Hi enim primum non secunda in sede dactylicum aut trochaicum ponunt verbum, quod in prima incipit, ut ἄειδε et versu quinto οἰωνοῖσι. Eam legem, quae ut Homero ita Hesiodo et subsequentibus poetis ignota erat, ab Alexandrinis, fortasse a *Callimacho* ipso, profectam esse Meyerus merito autumat. Hic enim in 1147 hexametris bis tantum eam violavit, qua severitate metrica Leonidam Tarentinum, Antipatrum Sidonium, alios in imitationem suam traxit (vide Meyeri observationes). His adiungendus est etiam *Crinagoras*, qui in centum triginta septem hexametris bis regulam migravit idque in uno eodemque epigrammate 18: v. 1 Ἡρνήσαντο καὶ ἄλλαι et v. 3 κληθείητε καὶ ὕμεις; at statim liquet hanc non esse veram exceptionem, immo rhetorico consilio, quod vel ex compari verborum positione apparet, duo exempla deberi. — Deinde in primi

---

<sup>1)</sup> Haud secus Crinagoras ut vel ei poetae qui alioquin laxiorem metricam rationem sequuntur (cf. Herm. Orph. p. 692 sqq.) vocabulum evitabat prima quarti pedis syllaba brevi finitum, unde elucet foede deformasse Boissonadium et Bothium et qui eis temere credidit Duebnerum primum versum epigrammatis 27, cum conicerent: Ἀχρεϊ τεῦ, ᾧ δειλαίε, κεναῖσιν ἐπ' ἐλπίσι θυμέ; scriptura ἐπ' ἐλπίσι (P) minime sollicitanda erat tali coniectura, quae omnibus regulis metricis repugnet (cf. p. 40.).

Iliadis libri versu primo offendendum erat Alexandrinis, quod caesura semiquinaria exitu vocis iambicae θεά efficitur, quae primariae hexametri caesurae non minus impar est quam caesurae pentametri. Quo factum est, ut *Callimachus*, quem hanc quoque legem epico versui scripsisse Meyerus suspicatur, in 1147 hexametris ter decies, *Antipater* Sid. in 350 hexametris quater — haec quidem exempla certa sunt — iambum illi sedi insererent. Neque minus diligenter eum cavit *Crinagoras*, cum bis tantum regulam violaret ep. 34,5: οὐδὲ πέριξ et 20,5: τοιγὰρ ἔδυν. — Tertium autem, quod in Iliadis versu Alexandrinis arri- dere non potuisse Meyerus dicit, in ea re cernitur, quod caesurae et semiquinaria post θεά et semionaria post Πηλ- ηϊάδεω in uno versu coniunctim positae sunt. Quam licentiam bis admisit *Callimachus*, nusquam *Leonidas* Tar. et uterque *Antipater*. *Crinagorae* duo laesae legis exempla leguntur: ep. 8,1, ubi quidem nomini proprio Ἡρῇ tam arte adhaeret enclitica τε, ut unius vocis instar sint, alterum in ep. 36,3, qui versus male traditus est, sed ἐπὶ cum antecedenti voca- bulo in unum coire videtur. — Jam ut quae adhuc disputavimus, paucis complectar, *Crinagoras* in his Alexandrinorum regulis observandis unus omnium religiosissime versatus est summaque cum sollertia; unde coniecturam facere licet, quam frequenti et diligenti illorum carminum lectione<sup>1)</sup> imbutus sit. Atque ne quis *casui* eas, quas Meyerus secutus exhibui observationes metricas attribuat, recognoscat velim cum viro illo doctissimo Theocriti idyllia I, II, XI, XV, quorum in 545 hexametris pri- mam legem undecies, secundam *trices quinques*, tertiam duodevicies violatas esse inveniet. — At res, quam ultimo loco persecuti sumus, iam propius accedit ad id caput, quod nunc tractaturi sumus

## 2. De caesuris hexametri.

Notum est nostra aetate controversiam ortam esse inter vv. dd., quae legitima esset Alexandrinorum caesura, bucolica

---

<sup>1)</sup> Vereor paene, ne putidum sit denuo monere illius studii residuum etiam exstare in ep. 41, minus certum in ep. 29 (cf. caput quartum).



an una ex tertii pedis incisionibus. Alii illam, alii has eo nomine nuncupaverunt. Sed utut est, nemo negabit primam legem Alexandrinos ut ceteros poetas sibi statuuisse eam, ut *tertius* pes distingueretur incisionibus, praeterea eos maxime bucolicae caesurae fuisse, quamquam haec nusquam *necessaria* esset. Etenim, ut primus vidit Meyerus, non oportebat caesuram semiquinariam una bucolica sublevare, cum *semiseptenaria* idem effici posset. Idem fere de Callimacho Kaibelius (l. l.) exponit, nisi quod hic vir doctissimus semper a bucolica caesura, non, ut par erat, a *tertii* pedis incisionibus proficiscitur, neque semiseptenaria non minus quam bucolica caesura penthemimerem fulciri posse perspexit. Attamen verum aliquatenus sensit, cum de Callimachi caesuris haec disputavit: „Penthemimere sola rarissime se continuit, cuius in epigrammatis nullum, pauca sunt in hymnis exempla neque ea subtili quodam artificio destituta. Ubique enim anapaestos subiungit, spondeum numquam nisi anaphora quaesitum“, ut bucolica caesura neglecta haec tantum forma evadat: —, — —. Contra Meyerus non tales anapaestos, sed caesuram semiseptenariam solam requiri dicit, etsi fortasse ipse concedet illis venustiore speciem conciliari hexametris ea caesura distentis, quam si spondeus semiquinariam excipiat: —, — —. Iam ad Crinagorae epigrammata animum attendentes facile percipiemus etiam caesuris quam elegantissime conformandis eum enixe operam dedisse. Recensuimus eius hexametros centum triginta septem, ex quibus octoginta unus incisione κατά τρίτον τροχάιον ita succincti sunt, ut sex et quadraginta simul bucolica incidantur; quinquaginta sex semiquinariam exhibent caesuram, ex quibus *novem* tantummodo carent caesura bucolica. Omnes igitur hexametri Crinagorae in tertio pede singulas incisiones praebent, simul bucolicas caesuras, si omnes computamus, *nonaginta tres*, unde cognoscas etiam Crinagoram hanc caesuram (secundariam) in deliciis habuisse. Iam ad illos versus novem nos convertamus, qui penthemimere distenti bucolica caesura vacant. Sunt hi:

1. ep. 8,1: Ἦρη, Ἐληθιῶν μήτηρ, Ἦρη τε τελείη;

2. ep. 33,1: Οὐδ' ἦν Ὀκεανὸς πᾶσαν πλήμυραν ἐγείρη, quibus



de versibus iam antea dictum est; adde utrumque semi-septenaria distinctum esse a Crinagora.

3. ep. 41,3: αἰδεῖ δ' Ἐκάλῃς τε „Φιλοξείνοιο καλὴν“;
4. ep. 42,1: Νῆσον τήν, εἰ καὶ με περιγράφαντες ἔχουσιν;
5. ep. 34,5: οἷσι γάρ οὐδὲ πέριξ δρυτόμοι ἀπεφαιδρύναντο;
6. ep. 36,3: χαῖται δ' — οὐ μῆλοισι ἄτε που μαλακοὶ ἔπι  
μᾶλλοι —;
7. ep. 22,3: ἤρπασας, ὦ ἄλλιστ' Ἀἰδῶ· τί πρόωρον ἐφίεις;
8. ep. 23,5: ὀθνεῖοι καμάτους τοὺς σοὺς διεμοιρήσαντο;
9. ep. 18,5: παιδὶ γάρ, ὃν τόμβῳ δίῃς ὑπεθήκατε βώλου.

Tertium et quartum exemplum omittere debebam, siquidem oculis τε et με adhaerentibus caesura x. tr. troch. efficitur. In quinto, sexto, septimo exemplo offendere non potes, cum egregie molliantur anapaestis. Qua medela destituti leguntur soli ei hexametri, qui postremi recensiti sunt, ut tamen semiseptenaria caesura neuter careat. Atque etiamsi facillimum sit anapaestum in octavum hexametrum (ep. 23,5) inferre inverso verborum καμάτους τοὺς σοὺς ordine (scribere enim licet τοὺς σοὺς καμάτους, quod sensui non repugnat), tamen coniectura satius est abstinere, cum hoc carmen inter priora Crinagorea locum habeat. Aliter statuimus de ep. 18,5. Primum non praetermittere licet hoc epigramma, ad quod hexameter pertinet, referendum esse inter ea, quae venusta quadam incisionum arte exsplendescunt, sepulcralia illa quidem maximam partem. Excepto enim hoc ipso versu quinto omnes hexametri pari modo inciduntur et trochaica et bucolica caesuris. Idem observatur in epp. 15 et 1, quod falso inter erotica legitur; in ep. 14 autem omnes hexametri distinguuntur incisionibus semiquinaria et bucolica, quod idem cadit in epp. 39, 48, 49. Quo magis admirandum est carmen 18, quod alioquin haud inconcinne conditum est, hunc versum tam scabrum, tam non expolitus continere παιδὶ γάρ ὃν τόμβῳ δίῃς ὑπεθήκατε βώλου, etiam exitu recedentem a politorum hexametrorum forma (cf. Kaibelii Philodemum). Alterum accedit idque non parvi taxandum. Iure enim Heckerus<sup>1)</sup>

<sup>1)</sup> Idem v. d. et — quod nescivit — iam antea Geistius versu quarto proposuit Ὀξείαις, quod commendatur v. 7., ubi terra σηματούσσα

monet epitheto σηματοέσσα v. 7 (quo terra naufragorum sepulcris impleta dicitur) non convenire verba δίης βώλου v. 5. Praeterea durissime et vix recte dici Erotides tumulo terrae fecundae supposuisse puerum. Quare sibi persuasit hic nomina oblitterata esse domini, qui puerum sepeliendum curasset. Et lenissime se restituere arbitratur ὑπεθήκατο Βώλου, sed quo nomine filius Boli dictus fuerit, se ex δίης non posse elicere. Haec non suo iure asseverat v. d., cum insulae compellatae quasi homines ipsae puerum glebae suae (*pronomem* aegre sane desideramus) supposuisse dici possint, ut in titulo *Mytilenis* reperto (329 Kaib.), in quo uno eadem phrasis legitur, de Balbo dicitur: Τὴν κῶνα Λεσβιακῇ βώλῳ ὑπεθήκατο Βάλβος. Itaque neque in nomine domini oblitterato offendo, neque in dictione singulari, sed in adiectivo solo δίης, cuius loco aliud exspectamus anapaestica mensura praeditum et offensione sensus vacuum. Cui desiderio Herwerdeni v. d. coniectura (Mnem. vol. XIV,4) tam egregie, tam simpliciter subvenit, ut nihil supra possit; ille enim : littera post ω geminata<sup>1)</sup> scribit: παιδὶ γάρ, ὃν τόμβῳ ἰδίης ὑπεθήκατο βώλου. „Perfrequens est apud sequiores praesertim hic adi. ἴδιος usus, ut ponatur pro pronomine possessivo. Sententia: Puero enim quem vos propriae (vestrae) glebae tumulo supposuistis, nomen atque formam ipse dedit Amor.“

---

vocatur. Nam revera has maris Ionii insulas infames fuisse naufragiis apparet ex *Antipatri Thess.* ep. VII 639: τί Κυκλάδας ἢ στενὸν Ἑλλης κῶμα καὶ Ὀξείας ἦλεα μεμφόμεθα; Itaque hanc coniecturam speciosam et ingeniosam hand cunctanter in textu reponerem, nisi obstare videretur *Strabo* [l. 8. p. 351 ad 0,298 ἐνθεν δ' αὖ νήσοισιν ἐπιπροέηκε Θοῶσιν] Θοῶς δὲ εἶρηκε τὰς Ὀξείας, τῶν Ἑχινάδων δ' εἰσὶν αὐταὶ κτλ. et l. 10. p. 459: καὶ αἱ Ὀξεῖαι καλούμεναι αἷς ὁ ποιητὴς Θοῶς εἶπε. Cum fieri non possit, ut, si modo insulae iam permutarant nomen, sic luserit poeta, Menippi amicus, aut suo Marte Homeri versum ita interpretatus est *Strabo* aut utroque loco *adjectivi* vicem idem obtinere voluerat non n. pr., aut cum *Jacobsio* scribere oportet: ἐσσεῖται. Controversiam transigant geographiae antiquae peritiores, nos interea inclinamus maxime ad sententiam medio loco propositam (v. notam).

<sup>1)</sup> Scriba etiam primum : omisit.

Quam coniecturam si merito approbavimus, Crinagoras haud aliter ac ceteri poetae tersiores aut trochaicam caesuram bucolica saepissime vel plerumque potius assumpta ad hexametros adhibuit aut semiquinariam vel adiuncta bucolica caesura vel (rarissime) ita in versus intulit, ut anapaestus, nusquam fere spondeus, incisionem exciperet; saepius autem, uti diximus, omnes eiusdem epigrammatis hexametros eisdem caesuris exquisita quadam arte distinxit.

### C. Prosodiaca.

#### 1. De atticis correptionibus.

G. Hermannus, ubi epici versus historiam exponit, quamquam (p. 764. l. 1.) iure cavendum esse dicit, ne multa quae excusari vulgo solerent, apud poetas elegiacos critici patienter ferrent, tamen si correptionum brevium syllabarum ante mutam cum liquida ratio haberetur, ipse concedit has aliquanto magis ab epigrammaticis praecipue quam ab epicis usurpari. Neque vero hoc esse cur miraremur, cum et brevia fere essent ista carmina et gravitate cederent epicis. Crinagoras undecies hanc licentiam sibi indulgit, nam duo exempla (ep. 45,3: Καίσαρα κλεινόν et 3,2: οἷα Προμηθεΐης) nominibus propriis excusantur. Cetera haec sunt:

ep. 1,1: τί σε πρῶτον; 2,4: οὐχ ὕπνον; 3,4: παῖς πατρός; 5,1: ἀγκυλόχειλος ἀκρόπτερον; 7,6: ἄγοιτε τριχός; 9,4: λέλογχε πέτρης; 19,1: ἤχλυσεν ἀκρέσπερος; 22,3: τί πρόωρον; 30,3: κατασπασθεῖσα κλύδωνι; 42,4: κάρπιμον ἀκροδρύου; 43,2: ἄπειμι χρόνον. Nusquam igitur in eis carminibus, quae posteriori Crinagorae aetati attribuimus, haec libertas usu venit. Nam quae invenitur in ep. 19,1, ut huic sententiae non adversatur, ita Geistii (Woltersii) non opitulatur. Contra quae leguntur in epp. 42 et 43 correptiones, cum nostra de tempore, quo ortae sint, opinione concinunt. Invitis membranarum *Emperius* (Opuscula, in Adversariis ad Brunckii *Analecta*) in ep. 20,4 ἡ με πικρῇ coniciens hanc libertatem intulit neque alia ratione Jacobsius, cum ep. 24,2: ἔργα κρατεῖ, ep. 47,1: αἰεῖ σοι ἑδραῖος suspicatus est. Correptionibus exiguus ille correptionum numerus non erat augendus.

## 2. De hiatibus.

Multo minorem diligentiam quam in eis, quas adhuc adumbravimus, rebus Crinagoras in hiatibus vel evitandis vel adhibendis collocasse videtur, quod sane ut memorabile ita explicatu difficile est. Namque permagnus hiatus numerus non modo legitimorum, sed etiam rariorum in ducentis septuaginta quattuor versibus Crinagoreis deprehenditur, quos in partes ab Jacobsio (l. l.) propositas distribuere haud ab re sit. Primos igitur recensebo ex hiatibus in longis syllabis obviis eos, qui ex interiectionis cum nomine concursu orti sunt. Ecce exempla ipsa: ep. 22,3: ὦ ἄλλιστ' Ἀΐδῃ; 32,1: ὦ ἐλσεινή. — Ex longae vocalis cum praepositione concursu, quae quidem in duobus exemplis extremis in anastrophe posita est, nati sunt hi hiatus: ep. 12,3: σῆ ἐπὶ μειδήσαντα (Jac. γ' inculcat; cf. notam); 14,5: καῖμαι δ' ἐν ξείνῃ ὑπὸ χερμάδι; 23,3: ἦ ἐπὶ Νεῖλω; 30,5: πενίῃ ἀπελύσατο; 34,5: δρυτόμοι ἀπεφαιδρύναντο; 36,3: μαλακοὶ ἐπὶ μαλλοί; 36,5: τριτοκεῖ ἀνὰ πᾶν ἔτος<sup>1)</sup>; 42,5: καὶ ὑπὸ μαίρῃ;<sup>1)</sup> 46,3: διωκομένῳ ὑπ' ἀήτῃ; 21,1: μόρῳ ἐπὶ; 42,8: τῷ ἐπ' ἐωρίσθην. — Unum exemplum n. pr. excusatur: ep. 46,1: μεγάλου Εὐνοσίχθονος. — Homeri auctoritas (sic. Jac.) tuetur hos hiatus: ep. 25,1: μὴ εἵπῃς; 39,6: ἦ ἀγαθόν. — Contra qui extra hos ordines inveniuntur hiatus ab Jacobsio aliisque temptati sunt: ep. 1,5: Πρώτῃ σοὶ ὄνομ' ἔσκεν, ubi v. d. cum Hermanno γ' interposuit; 19, 1: καὶ δ' αὐτῇ ἤχλυσεν, quod antea mutatum Jac. in notis servandum esse dicit; δ' interiecimus ob aliam causam (cf. notam); 26,1: ἐπεὶ ἐφράσσατο, hoc enim cod. praebet, non ἐπεὶ τ'; 33,5: καὶ ἱεραὶ, Jac. ipse de coniectura sua: καὶ ῥ' ἱεραὶ dubitavit (cf. notam); 47,1: Εἰ καὶ σοὶ ἐδραῖος, quem hiatus transpositione effugere vult Jac. sed ita, ut ex fumo in ignem iverit (cf. p. 38); 51,5: καὶ ὀπόσαι τμηθέντος, quem hiatus exuebat idem v. d. ῥ' particula rursus arcessita.

Nos omnes horum versuum *ceteroquin minime corruptorum* correctiones abiciendas esse et Crinagoram in hac re non ad

<sup>1)</sup> frustra alter ab Hermanno (τριτοκεῖ ἀνὰ), ab Jacobsio alter (ἦδ' ὑπὸ cf. supra) sublatus est.

Alexandrinorum, sed ad unum Homeri usum se applicasse arbitramur.<sup>1)</sup>

Eo autem hiatu, qui ex brevium syllabarum concursu originem ducit, poeta plane abstinuit, nam quod ep. 27,1 legitur in Pl.: κεναῖς ἐπὶ ἐλπίσι (ἐπ' ἐλπ. P), aptissime sic mutamus et emendamus, ut cum Jacobsio ἔτ' praepositioni praemittamus, quae particula omissa est etiam ep. 3,3: ἀεθλον ἔτ' ἐκ χερός.

### 3. De elisionibus.

Poetas posteriores in elisionibus usurpandis parcissimos fuisse et, si evitari non poterant, in eis quam maxime molliendis multam operam consumpsisse nemo est quin sciat. Id de Callimacho probe ostendit Benekius l. l. Hic poeta in epigrammatis (140 hexametros B. recognovit) quinquaginta tres elisiones admisit, sed praeter perpaucas non nisi in nominibus propriis, numeralibus, particulis, interiectionibus, pronominibus, quae *libera vocabula* Hilbergius nominat, abstinuit praeterea<sup>2)</sup> elisionibus fere post caesuras semiquinariam et trochaicam tertii et quarti pedis. Haud aliter Crinagoras, qui sexaginta omnino elisiones adhibuit, quas tabula hac indicabo adiectis numeris Callimacheis:

	I			II			III			IV			V			VI		
	3	2	15	9	1	1	2	0	7	0	0	1	10	5	1	0	0	
Crin.	3	2	15	9	1	1	2	0	7	0	0	1	10	5	1	0	0	
Call.	12	1	3	3	4	4	2?	0	5	2	0	0	10	4	4	0	1?	

Itaque si exipias ep. 22,3: ἤρπασας, ὦ ἄλλιστ' Ἀἰθῇ et 8,3: ὠδῖνας νεύσαιτ' Ἀντωνίη, quibus nomen proprium excusationem parit, eisdem ac Callimachus sedibus evitavit elisionem; *nomina* autem et *verba* elisa inveniuntur haec: ep. 24,5: ἴδ' ὅπ' ἐχθροῖς; 27,3: ἄλλοις ἄλλ' ἐπ' ὄνειρα (ubi manifesto consilio rhetorico vocabulum repetitum est); 23,1: Ὡ δόστην' ὀλβοιο Φιλόστρατε (item). Si vera sit Mommseni sententia, (cf. p. 21) etiam

<sup>1)</sup> Attamen in *posterioribus* carminibus etiam ab hac licentia multum recessisse videtur.

<sup>2)</sup> Hoc statuere demum potuit v. d. omnium nimirum Callimachi hexametrorum ratione ducta.

in posterioris aetatis epigrammate laxior haec elisio legatur. At quoquo modo res se habet, ex paucis his exemplis id descendendum est non licere praeter necessitatem elisiones huius poetae versibus inculcare, quae nominibus aut verbis conformentur. Qua metrica potissimum ratione commotus ep. 48,5: *μείζον* non *μείζον'* legendum esse statuo atque Hermannii coniectura, qua ep. 26,5: *τρίτοχα'* legendum existimat, sponte diluitur. — In transcurso etiam monemus in pentametris aliam ut apud Callimachum sic apud Crinagoram elisionum rationem obtinere<sup>1)</sup>.

#### 4. De longarum vocalium et diphthongorum correptionibus.

Longarum vocalium et diphthongorum verbum a vocali incipiens praecedentium correptiones primus, quantum scio, *Kaibelius*, ubi de Philodemi ratione metrica disputationem instituit, tractavit primusque ostendit trochaicam correptionem (*πλοῦς μοι ἐπ' Ἰταλίην*) multo rarius iam a veteribus poetis elegiacis<sup>2)</sup> adhiberi quam dactylicam (*στέλλομαι, ὦν ἦδη*).

Etiam religiosius „elegantiores numerorum artifices trochaico hiatu“ (immo correptione tr.) „versum interrumpere verebantur, cum dactylicum admitterent, sed certis quibusdam locis“. Velut *Callimachus* (καὶ particulae correptione nimirum semper exclusa) in epigrammatum pentametris *nullum*, in hexametris *quattuor* (duo ante caes. buc., duo in pede primo) *dactylicae* correptionis exempla admisit. Ex successoribus eius non omnes tam severas sibi statuerunt leges. *Meleager* demum illius exemplum imitatus est, cum in epigrammatum (130) hexametros non nisi duodeviginti intulit dactylicas correptiones, (quattuordecim ante c. b.), in pentametros etiam

<sup>1)</sup> Attamen inde quoque aliquid lucramur. Nam elisio qualis est *πρῆξι' ἀσπασίῳ* (ep. 46,4) non condonari potest nisi *tironi poetae*.

<sup>2)</sup> Apud Callinum, Tyrtaeum, Archilochum, Mimnermum, Solonem in hexametris inveniuntur sec. *Kaibelium* quadraginta sex *dactylicarum* corr. exempla, ex quibus triginta quattuor ante caes. buc., in quinto pede septem, in primo quattuor, in tertio unum, nullum in secundo; in pentametris novem in priore, duodetriginta in posteriore parte; correptiones *trochaicae* omnino novem, ex quibus tres in pentametris.

pauciores, contra *unum* dumtaxat certum trochaicae correptionis exemplum (A. P. XII 53,3). Idem cadit in Antipatrum Sid., qui octo dactylicas correptiones sibi indulsit, trochaica plane abstinuit; idem in Philodemum quoque et in Apollonidam, aequalem *Crinagorae*. Hic vero in usu correptionum non sibi constitit, non aequabilem semper artem adhibuit; res certe digna est, in quam acrius inquiratur. Duo enim in genera epigrammata discedunt, si ad correptionum *rationem* describuntur. Primum genus in eis consistit, quae plures et audaciores utriusque classis praebent correptiones, alterum in eis, quae aut nullam exhibent aut legitimas tantum et a politioribus quoque poetis frequentatas, correptiones dico ante caes. buc. Hoc discrimen aut *casui* attribuendum erit aut *processibus*, quos temporum progressu *Crinagorae* ars metrica fecit. Quae controversia dirimi fortasse poterit, si ea epigrammata, quae certis annis adstringere licet, comparabimus ex ratione correptionum: Epigramma in Corinthi libertinos scriptum (32: ca. a. 710) cui primo clarum temporis indicium impressum esse statuimus, continet v. 3 dactylicam, v. 4 trochaicam correptionem; secundo loco posuimus carmen in Philostratum conditum (23: ca. a. 724), item includeus correptiones dactylicam (v. 2) et trochaicam (v. 1). Jam ante hoc pactum esse suspicati sumus ep. 43 (*intra a. 710 et 724*), quod procul dubio omnium pessime habitum est, si ad correptiones spectamus, nam non minus *quinque* complectitur, in quibus duas trochaicas (vv. 1 et 4); rariorem praestat etiam ep. 46 (cf. p. 41<sup>1</sup>) ad *idem iter* pertinens.<sup>1</sup>) Item ep. 41, *ante a. 729* scriptum, correptionem trochaicam exhibet. Praetermittendum non est praeterea ep. 34 (ca. a. 729) in aquas Pyrenacas, dactylicis duabus correptionibus instructum. Carmini autem in nuptias Cleopatrae iunioris (28: ante a. 734) correptionem trochaicam poeta inseruit. Postremum in hac classe dicendum videtur epigramma in partum Antoniae scriptum (8: paucis ad summum annis *ante a. 743*), in quod tres correptiones dactylicas

<sup>1</sup>) epp. 42 et 47 vacua paene sunt ea licentia, quod sententiae nostrae de eorum tempore neque adversari neque adminiculari consensaneum est.



intulit, duas nominibus propriis, tertiam nullo modo excusatam. — *Nulla* autem aut legitima (ep. 24,5) continetur correptio his epigrammatis,<sup>1)</sup> quae ad temporum rationes digeram:

ep. 49 ad Tiberii expeditiones pertinens ca. a. 746 scriptum sit oportet;

epp. 26 et 45 Augusto regnante composita sunt;

ep. 44 fortasse a. 758 scriptum est (cf. notam);

ep. 24 a Mommseno a. 763 assignatum;

ep. 31 post a. 767 ortum esse demonstravimus;

ep. 33 a. 769 scriptum.

Recensuimus omnino duodeviginti epigrammata vacua correctionibus, sex singulis ante caes. buc., tria singulis in primo pede ideoque legitimis accincta, in summa viginti septem (*plus quam maior pars* omnium Crinagoreorum). Recte igitur in hac causa versabimur, si statuemus certum quendam terminum, unde maior metricae artis, correptiones si spectamus, observari coepta sit severitas. Quem terminum intra annos 740 et 746 pangendum esse ex eis, quae supra exposuimus, facile cognoscitur. Atque ut, quod contra hanc argumentationem dici possit, quodam modo occupem, haec addam: miram illam epigrammatum rationem explicare oportet sine dubio eum, qui non obtusa acie rerum causas investigare supersedeat, non satis habeat res ipsas protraxisse. Itaque uti diximus, nihil relinquitur nisi ut aut casui aut metricae artis progressibus attribuamus eam, quam adumbravimus, varietatem metricam. Variatio delectat procul dubio multis in rebus, neque tamen in arte metrica, quae non arbitrio cuiuslibet permittitur, sed aut certas quibus teneatur leges flagitat aut certam saltem rationem. Itaque si quis poeta correptionum leges omnino non respiciat, habeat sibi neque vero licet, non consentaneum certe est, eum in his epigrammatis correptiones diligentissime evitare, illa passim eis conspergere. Haec non esset licentia poetica, quam non agnoscere piac-

---

<sup>1)</sup> Ceteroquin — quod nolim praetereas — eadem expolita arte excellunt, si excipitur ep. 24.



lum fere est, sed mera libido, quam ego quidem assequi, cum qua luctari non possum. Statuimus autem supra Crinagoram partim versus rarissimis et audacissimis distinxisse correptionibus et trochaicis et dactylicis, partim versus vacuos ea licentia vel parcis et legitimis succinctos condidisse, neque tamen haec duo genera in epigrammatis temere permiscuisse, sed maiorem eorum partem posterius tantummodo genus versuum complecti, in minorem prius illud genus poetam congressisse. Deinde comprobare contendimus in hoc genere ea poemata sola locum habere, quae *ante a. 743* scripta esse aliis argumentis ostendi potest, ea quae inde *ab hoc anno* in lucem prolata sunt, adscribenda esse alteri generi. Neque igitur temeritatis crimine implicari nobis videmur, cum circa hoc tempus mutationem illam incessisse dicimus. Neque abest coniectura, qua explicetur. Supra ostendere conati sumus Crinagoram si regulas a Meyero primo patefactas et illustratas, si caesuras et elisiones respicimus, totum se dedisse Alexandrinorum imitationi, maxime autem Callimachi poematis operam navasse, qui in omnibus epigrammatis non plus quam *quattuor* correptiones dactylicas sibi indulsit. Facile igitur fieri potuit, ut huius poetae studio commotus etiam correptionibus antea neglectis operam tribueret et pristinam, cui se addixerat, licentiam molliret atque adeo omnino exueret. — Quid autem ex metrica arte Crinagorae illum in modum mutata colligi licet? An omnia ea viginti septem epigrammata post hoc tempus scripta esse? Minime, id unum iure concludimus ex hac carminum ratione epigrammata rarioribus et audacioribus correptionibus instructa collocanda esse ante terminum illum. Sed ne haec quidem exigua sane summa eorum, quae elaboravimus in ea re perscrutanda, plane spernenda est, immo aliquem certe fructum ad tempora epigrammatum excutienda inde capere licet.

Pauca id genus afferre haud pigebit. In prima harum quaestionum parte, cum de ep. 48 disputavimus, probabiliter, neque tamen liquido statuere potuimus, quo potissimum imperatore carmen conditum esset. Nunc epigramma, cum duabus correptionibus distinguatur, *non dubitanter* ad priora

Augusti tempora referemus. Item coniecturae quam de ep. 36 Schneiderus periclitatus est (ad expeditionem *Tiberii* a. 734 susceptam id revocandum esse) cum tres contineat correptiones, ex quibus unam trochaicam in pent., metrica ratio non resistet, ut tamen aliis de causis num verisimilis sit, magnopere dubitem. Idem dicendum est de ea suspicione, qua Reiskius assentiente Geistio virginem, quae in pulcherrimo ep. 12 natalem diem celebrare dicitur, *Antoniam* minorem esse obtinet: correptiones eam adiuvant, probabilitas non item; idem de ea, qua idem v. d. ep. 15 ad unum ex eis militibus spectare putat, qui ab Augusto adversus Cantabros in Hispaniam ducebantur a. 729, etiamsi non prorsus abicienda sit (cf. p. 15.). Contra neque ratio metrica<sup>1)</sup> neque argumentum opitulantur alii eiusdem Reiskii sententiae a Geistio probatae, qua ep. 5 ad *Lucium* Caesarem pertinere conicit, natum demum a. 737. Geistii (Woltersii) autem de ep. 19 opinioni ab hac parte non obicitur ulla difficultas, item, quae nos de *Niciae* aetate disputavimus, iam correptione (ep. 25,3) non legitima fulcire possumus. In nota denique epigrammati 40 subiunctae ostendemus non recte v. 2 γράφαι Porsonum coniecisse in poemate non paucis annis post a. 732/3, ut videtur, concinnato. — Omnium vero pessime comparatum esset, si Crinagorae vindicari posset, ep. 6, cuius versus primus praeterea solus omnium, quamquam semiquinaria caesura instructus est, in monosyllabum et bisyllabum vocabulum desineret. Et correptiones quidem praeter unam dactylicam ante caes. buc. (v. 3) singulas continet in pentametri priore (v. 6) et posteriore parte (v. 2), duas praeterea trochaicas (vv. 1 et 3). Nullo modo haec offensio mollitur, ut factum esse videmus in ep. 43, caesurarum ratione, cum tertius tantummodo versus caesuram bucolicam admixtam exhibeat trochaicae, ceteri omnes trochaicis solis incidantur. Etiam sensum epigrammatis multis vitiis laborare, intellegent qui Jacobsii notas perlegerint, ea sanare vel potius perlustrare non est huius loci. Ut tamen ab epigrammate rimando nondum recedamus, facit caput, quod iam tractandum nobis proposuimus, de spuriiis epigrammatis Crinagoreis.

<sup>1)</sup> Duae insunt correptiones, altera trochaica in pentametro.

Numeri, quibus Anthologiae epigrammata notantur in hoc opusculo:

	Anth. Pal.		Anth. Pal.
1 . . . . .	V 108	27 . . . . .	IX 234
2 . . . . .	V 119	28 . . . . .	IX 235
3 . . . . .	VI 100	29 . . . . .	IX 239
4 . . . . .	VI 227	30 . . . . .	IX 276
5 . . . . .	VI 229	31 . . . . .	IX 283
6 . . . . .	VI 232	32 . . . . .	IX 284
7 . . . . .	VI 242	33 . . . . .	IX 291
8 . . . . .	VI 244	34 . . . . .	IX 419
9 . . . . .	VI 253	35 . . . . .	IX 429
10 . . . . .	VI 261	36 . . . . .	IX 430
11 . . . . .	VI 161	37 . . . . .	IX 439
12 . . . . .	VI 345	38 . . . . .	IX 513
13 . . . . .	VI 350	39 . . . . .	IX 516
14 . . . . .	VII 371	40 . . . . .	IX 542
15 . . . . .	VII 376	41 . . . . .	IX 545
16 . . . . .	VII 380	42 . . . . .	IX 555
17 . . . . .	VII 401	43 . . . . .	IX 559
18 . . . . .	VII 628	44 . . . . .	IX 560
19 . . . . .	VII 633	45 . . . . .	IX 562
20 . . . . .	VII 636	46 . . . . .	X 24
21 . . . . .	VII 638	47 . . . . .	XI 42
22 . . . . .	VII 643		Anth. Plan.
23 . . . . .	VII 645	48 . . . . .	IV 40
24 . . . . .	VII 741	49 . . . . .	IV 61
25 . . . . .	IX 81	50 . . . . .	IV 199
26 . . . . .	IX 224	51 . . . . .	IV 273



Prolegomena cuncta et epigrammata Crinagorea apparatu critico instructa prodibunt propediem apud Mayerum et Muellerrum, Berolini.

## Theses.

---

1) Pedes solutos in iambographorum trimetris et tetrametris si spectamus, Archilochus et Hipponax ad permagnam *Euripidis* licentiam proxime accedunt, cum Solonis unum (fr. 33,3: περιβαλών; fr. 35,1 nondum iustam sententiae et numerorum medelam accepit), Simonidis Amorgini nullum certum exemplum legatur.

2) In Cyclopis fabula Euripides non modo comicis personis (sic *Herm.*), sed etiam cui tragicæ sustinendæ sunt partes, *Ulixi* tribrachos (cf. v. 425: δὲ παρὰ), dactylos (cf. v. 99: Βρομίου πόλιν), anapaestos (cf. v. 590: ἄγε δὴ Διονύσου παῖδες, v. 260: ἐπεὶ κατελήφθη) attribuit, qui laxioribus numeris eminent magisque ad comoediae libertatem accedentibus, sed attribuit ea conditione ut simul heroem satyricè loquentem, cothurni tragici quasi obliviscentem inducat.

3) Inter Antiphontis tetralogias et orationes quæ intercedunt elocutionis — nam argumentum non iam suspectum videtur — discrimina et temporis intervallo et eo explicantur, quod illæ non ad intelligentiam vulgarem accomodandæ, sed eorum in usum scriptæ erant, qui oratores evasuri inde materiam sumerent ingenii exercendi atque argumenta non minus quam externam formam imitando exprimerent. Itaque cum in declamationibus Antiphontis dicendi et cogitandi antiquitas et altitudo atque novorum et poeticorum verborum captatio liberius exsultare non modo potuerit, sed etiam debuerit, eo referendus est particularum τε . . τε usus poeticus, quo non solum ut apud ceteros oratores (cf. Fuhr. M. Rh. vol. 33) τε καί particulae coniunctæ, sed coniunctio quoque, quæ per τε . . . καί efficitur, semper fere compensatur.

4) Historici quamvis licet asseverent Maecenatem cum Horatio in summo belli Actiaci discrimine in urbe adfuisse; firmissime hoc refutatur sobria epodorum 1 et 9 (imprimis vv. 1, 11—16, 17, 35) et elegiæ A. L. 779 interpretatione; sed enim nonnulli interpretes novissime epodi noni vim nativam interpretando plane infregerunt.

5) Eundem esse Macrum Ovidianum *Piæus* qui vocatur atque M. Pompeium Junio rem epigrammatistam imprimis ex epigrammate probatur, quod hic de exilibus Mycenæ *Homericae* reliquiis condidit (A. P. IX 28).

6) In Vell. Pat. l. II c. 5,2, ubi legitur: „non deterritus (sc. Metellus Macedonicus) proposito perseverantia *ducis* quem moriturum miserat militem victorem recepit“, librarii interpretamento vocabulum quod est *ducis* ex *sua* ortum esse puto.

7) Lollii Bassi de Germanici obitu epigramma A. P. VII 391 editor Par. praepostera interpunctione pervertit, cum *Αὐτὸς ἐγὼν Ἄλδας ἐνέπω* (vertit: *edico*:) *Γερμανικὸς ἄστρων οὐκ ἐμός· οὐ χωρεῖ νῆα τόσην Ἀχέρων* scribens ab disticho antecedente *ἐνέπω* cum Jacobsio disiunxit.

8) De *Juvenalis* exilio fabellam, qui composuit cum poetam militasse haud ignoraret, hac scientia ad sat. VII vv. 88—92 illustrandos [ubi cum Mommseno *semenstri* ad *militiae largitur honorem* (Offizierstand) revoco, nam nihil est aurum *semenstris* tribunatus] non inscite usus est; revera *Iuvenalis* numquam exulavit.

9) Elagabalo mortuo senatus ut vim suam diu neglectam iam clare praeferret, *iterum* (sic interpretor Lampr. Alex. c. 1) novum principem imperii insignibus induit. Nam Elagabalum, ut militum iram leniret, consobrinum suum iam *Augustum* fecisse ex inscriptionibus duabus recte concluditur et — hoc addere neglexerunt vv. dd. — ex cod. Iust. IV 44,1; VIII 44,6; IX 1,3; IV 50,2 (?).

10) Planudem ex Cephalae Anthologiae apographo suam conflasse cum ex aliis indiciis colligi potest tum ex cod. Palatini lectionibus eis, quas nescio qua causa oblitteratas et perrossas scribae invenerant in exemplari suo, quas item offenderat Planudes, cf. A. P. VII 247,1; VII 567,5; VII 628,4; VII 660,3; IX 439,5.

~~~~~

## V i t a.

---

Maximilianus Rubensohn natus sum a. d. XI. Kal. Dec. anno h. s. LXIV Huxariae, quod Guestphaliae oppidulum prope monasterium Corbeiense situm est, patre Emanuele, matre Adelheida e gente Herrlich, utroque adhuc vivo; fidei addictus sum iudaicae. In patriae urbis gymnasio litterarum rudimentis eruditus Cassellas, in Chattorum sedem amoenissimam, cum parentibus demigravi. Ibi gymnasium reale, quod dicunt, tum florens rectore Preimiot usque ad secundam classem frequentavi; deinde quod iam tum statutum habebam antiquitatis studio me dare, a Mansio, viro doctissimo, graeca et latina lingua per quattuor menses institutus in secundam classem superiorem gymnasii Fridericiani receptus sum, quod a Vogtio regitur, viro humanissimo.

Vere anni LXXXIII maturitatis testimonium adeptus ad almam matrem Berolinensem accessi auctore maxime Samuele Herrlich, avunculo carissimo, qui a prima inventute studia mea numquam desiit benignissime opera et consilio adiuvare. Ibi per novies senos menses hi viri doctissimi in scholis me docuerunt: Aegidi, Bresslau, Curtius, Delbrück, Dessau, Diels, Dilthey, Hirschfeld, Hübner, Kiepert, Kirchhoff, Mommsen, Oldenberg, Paulsen, Scherert, de Treitschke, Vahlen, Zeller. Studiis philologicis me initiavit Dielsius, cuius exercitationibus integrum per annum interesse mihi licuit, cuius benignitatem etiam in hac commentatione suscipienda et perficienda saepissime expertus sum. Ad philosophicas exercitationes Paulsen, ad historicas Hirschfeld et Klebs, ad archaeologicas Furtwaengler et Robert, ad epigraphicas Hirschfeld et Kirchhoff, ad philologicas Vahlen benevole aditum mihi concesserunt. Praeterea seminario historico Mommseni per quinques senos menses interfui; per idem denique temporis spatium seminarii regii philologici sodalis fui ordinarius.

Gratias ago candidissimas omnibus eis viris, quos enumeravi, imprimis autem pia semper prosequar memoria Dielsium, Kirchhoffium, Mommsenum, Vahlenum, quibus quantum debeam ne verbis digne exprimere nequeam, maxime vereor.

